

DIDZA' GUSÖL-LË'Ë PABLO YÖDZÖ ROMA

*Pablo rugapë' Dios bönachi queë' Cristo nacu'ë
Roma*

¹ Neda', Pablo, naca' bönni' nadó'o queë' Jesucristo, en gubáz queë', tu' bulidzë' Dios neda', en guró cazë' neda' para guna' libán que didza' dxi'a queë'.

² Dza ni'te guzxi' lu në'ë Dios isöl-lë'ë didza' dxi'a na' queëru'. Gunnë' caní lu ruá'agaquië' bönni' gulu'ë didza' uláz queë', ate' légaquië' bulu'zúajë' le lu guichi lá'ayi queë' Dios.

³ Bulu'zúajë' lu guichi yúgu'të le ral-la' gunë' Zxí'inë' Dios, Nu na' naca Xanru' Jesucristo. Lu yöl-la' bönachi queë' náquië' zxi'ini xi'sóë' David,

⁴ pero ca naca bö' naca cazë', le naca lá'ayi, naca bë' náquië' Zxí'inë' Dios, en nápadë'ë yöl-la' huáca. Naca bë' náquië' caní tu' bubanë' lu yöl-la' guti.

⁵ Ni'a que le benë' Jesucristo ruzí'iru' xibé le ruzá' ládxë'ë queëru' Dios, ate' benë' ga naca' gubáz queë' para uláz queë' Lë' guna' ga ila'yéajlë' bönachi idútë yödzölió Lë', en ilún ca rnna xtídzë'ë.

⁶ Bítsa'li' libí'ili' ladjagaca bönachi yödzölió na', pero na'a nulidzë' Dios libí'ili' para guéquili' queë' Jesucristo.

⁷ Rugapa' Dios libí'ili', yúgu'tëli' zóali' Roma. Dios nadxí'inë' libí'ili', en bulidzë' libí'ili' para gácali' quez queë'. Rinábida'-në' Xúziru' Dios, enca' Xanru'

Jesucristo, gunnë' queëli' le ruzá' ládxe'ë queëru', en le ribequi dxi ládxi'ru'.

Rë'ënë' Pablo tsöjyüë' bönachi queë' Cristo nacu'ë Roma

⁸ Lë ni risí lahua' ruzúaja' lu guichi: Tu' néquiru' queë' Jesucristo rea'-në' Dios: "Xclenu'" ca naca queëli' yúgu'tëli', ate' ta'guixjö' bönachi iduté yödzölió ca réajlé'ëli' Jesucristo.

⁹ Idú ládxa'a runa' xichinë' Dios, runa' libán que didza' dxi'a ca naca queë' Zxí'inë'. Nözinë' Dios rulídzatica'sa'-në', en rinábida'-në' gaca tsahui' queëli'.

¹⁰ Rinábitica'sida' Dios, channö naca le rë'ënë' Lë', gunnë' neda' lataj uduyúa' libí'ili'.

¹¹ Caní rinábida'-në' tu' raca ládxa'a ilé'eda' libí'ili' para gaca guna' ga gata' queëli' tu le unödzjë' Dios Bö' Lá'ayi queëli', le gun ga gácali' tsutsu.

¹² Lë na' rë'ënda' naca utipa ládxi'ru' turu' ia'turu', tu' réajlé'ëru' Jesucristo yúgu'tëru'.

¹³ Böchi' luzá'ado', rë'ënda' inözili' lë ni. Zián luzuí bë' ládxa'a guída' ga zóali', pero ga ridxintë na'a bití' runni quia'. Ré'ënda' guída' ga zóali' para guna' ga uzí'ili' xibé libán na' runa', ca na' tu'zí' xibé ia'bal-la bönachi yödzölió ni.

¹⁴ Dë le ral-la' guna' quégaca yúgu'të bönachi, quégaca bönachi nazëdagaca, en quégaca bönachi cabí nazëdagaca, quégaca bönachi ta'yéajni'i, en quégaca bönachi cabí ta'yéajni'i.

¹⁵ Que lë ni na', tscá gaca guna', zoa' riböza' guna' ca' libán que didza' dxi'a ga ni' zóali' libí'ili', zóali' Roma.

Yöl-la' huáca zxön que didza' dxi'a

16 Biti' ca' rutuí'ida' runa' libán que didza' dxi'a, tu' napa yöl-la' huáca queë' Dios para gun ga ulu'lágaca yúgu'tè nupa ta'yéajlè' le. Ga risí lo, ré'ënè' Dios ila'yönnè' bönni' judío le, ate' tōdi na' ila'yöni ca' bönachi izá'a.

17 Didza' dxi'a ni rulu'í rē'u gunè' Dios ga huöácaru' tsahui', channö uyéajlè'èru' Lè', en biti' gaca chopa ládxi'ru'. Ca naca lè ni nazúaj ca' lu guichi lá'ayi, rna: "Nu naca tsahui' tu' réajlè' Dios, gata' yöl-la' na'bán que nu na'."

Xíguia' nabága'gaca bönachi

18 Dios, Nu zoa yehua' yubá, bulu'e lahui biti' rilé'enè' dxi'a yúgu'tè le ruá' dö', en le cabí naca tsahui' tun bönachi. Gunè' xíguia' yugu' bönni' na', lu yöl-la' biti' naca tsahui' quégaquiè' ta'dá'baguè'è le naca idútè li.

19 Caní gaca quégaquiè' tu' nalá' lahui lógaca yúgu'tè bönachi le naca bë' zoa cazè' Dios, tu' bulu'í quézinè' Dios lè ni ga na' nacu'è.

20 Dza ni'te cate' si' guta' yödzülió, ga ridxintè na'a dza, yugu' le nunè' Dios nácagaca bë' le cabí gaca ilé'èru' queë' Dios, ca naca yöl-la' huáca idú queë', en le naca cazè' Dios. Que lè ni na', biti' gaca ila'nnè' biti' nabága'gaquiè' xíguia'.

21 Cate' ni' gulúnbè'è Dios, biti' gula'yéaj ládxi'gaquiè' Lè' ca ral-la' tseaj ládxi'ru'-nè' Dios, en biti' gulè' Lè': "Xclenu'." Que lè ni na', cá'asö böáca le gula'zá' ládxi'gaquiè', ate' gula'chul-la gula'nítiè' tu' nazidi icja ládxi'do'gaquiè'.

22 Sal-la' guléquinè' ta'yéajni'inè' yenni', bulu'huöáquiè' bönni' biti' bi nözguequinè'

²³ tu' bulu'cá'anë' yöl-la' beni' queë' Dios Nu zóatica'sö, ate' gula'yéaj ládxi'gaquië' budó' guiöj budó' yaga, budó' na' nácagaca ca yugu' bönni' tati cazë', en ca yugu' böa'do' zoa xíligacaba', en ca yugu' böa' guixi' ta'daba' lu yu, en ca yugu' böa' bëla tá'ayöj lé'ëba' lu yu ni.

²⁴ Que lë ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö', ate' caní guca, bulu'cá'ana cúngaquië' lu yöl-la' stu' tuë' len ia'tué'.

²⁵ Guca caní tu' bulu'cá'anë' xtídzë'ë Dios, le naca idútë li, ate' gula'zí' lu ná'agaquië' tu le cabí nácate. Gulunë' bal, en gula'yéaj ládxi'gaquië' yugu' le benë' Dios, en calëga Lë cazë' Dios, Nu na' ral-la' gáatica'sö queë' yöl-la' ba. ¡Ca' gaca!

²⁶ Que lë ni na' Dios guléaj ládxi'ë légaquië' para ilunë' yugu' le ta'zë ládxi'gaquië' le ruá' dö'. Yugu' nigula bulu'cá'ananu yöl-la' rizóalen bönni', para ilunnu le ruá' dö'.

²⁷ Lëscá' caní gulunë' yugu' bönni' biguiú', bulu'cá'anë' yöl-la' rizóalen nigula, ate' gula'zë ládxi'gaquië' le ruá' dö' túnlenë' tuë' ia'tué', en gulunë' le tun ga nu rutuí'i, tu' gula'cuá'lenë' la' luzá'a bönni'gacasë'. Que lë ni na' gula'guí'i gula'záquië' lu xipëla'gaquië' yugu' bönni' gulunë' caní tu' bubí'ë Dios quëgaquië' ca sa'yéaj dul-la' na' gulunë' tu' nucá'anagaquië' Dios.

²⁸ Tu' cabí gulë'ënnë' ilunë' Dios bal, que lë ni na' guléaj ládxi'ë Dios légaquië' para ila'zá' ládxi'gaquië' le biti' naca dxi'a, en ilunë' le cabí nazaca'.

²⁹ Túntica'së' yúgu'të le cabí naca tsahui', en yugu' le naca stu'.

Tunë' le ruá' dö', en tu'huídi'në'.
 Biti' ta'lé'enë' dxi'a luzá'agaquië', en tu'zxé'enë'
 luzá'agaquië'.

Tutië' luzá'agaquië', en ta'díl-lalenë' luzá'agaquië'.
 Ta'zí' yé'enë' bönachi, en zi'të nácagaquië' xihui'.
 Ta'nnë' que luzá'agaquië'.

³⁰ Ta'nnë' le cabí nácate que luzá'agaquië'.

Biti' ta'lé'enë' Dios dxi'a, en nácagaquië' bönni'
 bizxaj.

Tun cuíngaquië' lo, en tun ba zxön cuíngaquië'.
 Ta'guiljé' le ruá' dö' ilunë', en ta'dá'baguë'ë xuz
 xiná'agaquië'.

³¹ Nácagaquië' bönni' biti' ta'yéajni'inë', en tun
 díjagaquië' xtídza'gaquië'.

Biti' nácagaquië' dxi'i ladxi' ca ral-la' ilácagaquië'.

Biti' tu'niti lahuë' luzá'agaquië'.

Biti' tu'huechi' ládxi'gaquië' luzá'agaquië'.

³² Nözguequi quézinë' le nuzóë' tsaz Dios ca ral-
 la' gaca quégaca nupa tun yugu' le caní, ilátigaca
 tsaz. Sal-la' nöziguequinë' lë ni, calégasö caní
 tunë', pero ta'yaza ládxi'gaquië' nupa tun ca' caní.

2

*Naca tsahui' ichúguië' Dios quégaca bönachi
 gátigaca*

¹ Que lë ni na', biti' gaca ubéaj tsahui' cuinu',
 nútité's nu nacu', richugu bë'u luzó'o. Cate'
 richugu bë'u luzó'o, rusubaga' cuinu' xíguia', tu'
 richugu bë'u luzó'o, en lësca' runu' lí'.

² Nöz quéziru' ca ruchí'a rusöröë' Dios. Naca
 idútë li ca ruchí'a rusöröë' nupa tun le ruá' dö'.

³ Li' richugu bè'u nupa tun le ruá' dö', en tuz ca runu' li'. ¿Naru' réquitsenu' uló' li' cate' uchi'a usöröë' Dios?

⁴ ¿Naru' rucá' anatso' cá' asö yöl-la' dxi'i ladxi' idú queë' Dios, en yöl-la' riböza zxön ladxi' queë', en ca runë', ridzenë' para lenë' li'? ¿Naru' cabí nöz quézinu' ruzá' ládxë'ë Dios quiu' yöl-la' dxi'i ladxi' queë' para gunë' ga ubí'i ládXu'u?

⁵ Lu yöl-la' ládxi'do' zidi quiu' biti' rubí'i ládXu'u. Que lë ni na' rusubaga' cuínu' xíguia' gunë' Dios li' cate' uchi'a usöröë' bönachi, ate' gaca bë' naca ca ral-la' gunë' Dios cate' ichúguië' quégaca bönachi ilátigaca.

⁶ La' dza ní'isö ubí'i cazë' Dios que queë' bönni' tsa naca le gulunë' tu tuë'.

⁷ Unödzejë' yöl-la' na'bán idú quégaca nupa túntica'sö le naca dxi'a, tu' tuí'i ládxi'gaquië' ulu'zi'ë xibë' Dios, en ulu'rúajë' dxi'a lahuë' Lë', en ila'cuá'tica'së'.

⁸ Lu yöl-la' rilé queë', Dios gunë' xíguia' nupa ta'dá'baga', en biti' tē'ëni ilún ca rnna le naca idútë li, pero tun ca rnna le cabí naca tsahui'.

⁹ Ila'guí'i ila'záquië', en huí'inida' ládXë'ë yúgu'të bönni' tunë' le ruá' dö'. Ga risí lo gaca caní quégaca bönachi judío, en gaca ca' caní quégaca bönachi izá'a.

¹⁰ Dios gunë' ga ilácagaquië' bica' ba, en gunë' légaquië' bal, en gu'ë le cuéqui dxi ládxi'gaquië' yúgu'të bönni' tunë' le naca tsahui'. Ga risí lo gunë' caní quégaca bönachi judío, en gunë' ca' caní quégaca bönachi izá'a.

¹¹ Caní uchi'a usöröë' Dios bönachi, ate' Lë' biti' runë' bal le ta'nnasö bönachi.

12 Yúgu'të bönni' na' biti' bila'yönnë' le rinná bë' xibá queë' Dios, en gulunë' dul-la', lësca' ilátië', sal-la' biti' téquibe'enë' gula'dá'bagué'ë le rinná bë' xibá na', ate' yúgu'të bönni' bila'yönnë' le rinná bë' xibá queë' Dios, en gulunë' dul-la', Lë' uchi'a usöröë' légaquië' ca naca le rinná bë' xibá na'.

13 Caní gaca, tu' cabí nácaquië' tsahui' lahuë' Dios yugu' bönni' ta'yónisë' xibá queë', pero ulu'huóáca tsahui' lahuë' Lë' yugu' bönni' tunë' ca rnna xibá queë'.

14 Bönni' na' biti' nácaquië' judío, en biti' bila'yönnë' le rinná bë' xibá queë' Dios, pero tun cazë' ca rinná bë' xibá queë' na', bönni' ni, sal-la' biti' bila'yönnë' le rinná bë' xibá queë' Dios, zóalen légaquië' tu xibá le nuzóë' Dios icja ládxi'do'gaquië'.

15 Nupa ni tu'lu'i lahui le run xibá na' nazúaj lu icja ládxi'do'gaquië'. Le yu'u icja ládxi'do'gaquië' naca bë' naca caní. Ca ta'zá' ládxi'gaquië', tu'zéguië' luzá'agaquië' didza', o tu'béaj tsahui' luzá'agaquië' tuë' ia'túë'.

16 Caní ubi'ë Dios quégaquië' dza ni' uchi'a usöröë' lu na' Jesucristo yugu' le núngaquië', en le gula'zá' ládxi'gaquië' yúgu'të'. Caní rusëdi didza' dxi'a runa' libán que.

Yugu' bönni' judío, en xibá queë' Dios

17 Núlöli' rnnali' nácali' judío, en ruzxöni ládxi'li' xibá queë' Dios, en run ba zxön cuinli' tu' núnbë'ëli'-në' Dios,

18 nöz quézili' le ré'ënë' Dios gunli', en le rusëdi libí'ili' xibá queë', en réquibe'eli' le nácatërö dxi'a.

19 Réquili' gaca ulu'ili' nöza dxi'a nupa ta'dá ga yúbölö ca nu nachul-la lahui, en gaca uzéajni'ili' nupa nachul-la nanítigaca.

20 Réquili' gaca usédili' nupa biti' ta'yéajni'i, en nupa ta'yéajni'i láti'do'os, tu' dē lu ná'ali' xibá queë' Dios le rusēdi bönachi ca naca yöl-la' réajni'i idú, en le naca idútē li.

21 Na'a, libí'ili' rusédili' ia'zica'rö bönachi. ¿Naru' cabí ral-la' usēdi cuinli'? Libí'ili' rnnali': "Biti' cuanu'." ¿Naru' ribántsali' libí'ili'?

22 Rnnali' ca': "Biti' gunu' dul-la' le riguitsaj xibá que yöl-la' nutsaga na'." ¿Naru' rúntsali' libí'ili' dul-la' le riguitsaj xibá que yöl-la' nutsaga na'? Libí'ili' biti' rilé'eli' dxi'a yugu' budó' guiöj budó' yaga. ¿Naru' ribántsali' le dzó'ö lu yudo' quéguequi?

23 Run ba zxön cuinli' tu' dē lu ná'ali' xibá queë' Dios. ¿Naru' rucá'anatsali' Dios cá'asö, en riguitsjali' xibá le gunná bē'ē Lē'?

24 Nazúaj lu guichi lá'ayi ca runli', rnna: Ni'a que le runli' libí'ili' nupa biti' nácagaca judío ta'nnē zi' queë' Dios.

25 Le nácatē ruzi'u xibé lē na' narugu lu xipēlu'u le naca bē' nazí' lu ná'ali' xibá queë' Dios channö runu' ca rinná bē' xibá na' queë' Dios, pero channö riguitsju' xibá le gunná bē'ē Lē', nuhuóacu' ca tu bönni' biti' néquinē' queë' Dios.

26 Que lē ni na', channö zoë' tu bönni' biti' narugu lu xipélē'ē lē na' naca bē' nu nazí'i xibá queë' Dios, pero runē' idútē ca rinná bē' xibá queë' Lē', bönni' ni náquiē' lahuē' Dios ca tu bönni' narugu caz lu xipélē'ē lē na' naca bē' sal-la' biti' narugu lu xipēla' cazē'.

27 Bönni' na' biti' narugu lu xipélē'ē lē na' naca

bë' nu nazí'i xibá queë' Dios, pero runë' idú ca rinná bë' xibá na' queë' Dios, ca runë' bönni' ni rulu'i nabága'li' libí'ili' xíguia', sal-la' dë lu ná'ali' xibá na' queë' Dios, en narugu lu xipéla'li' lë na' naca bë' nazí' lu ná'ali' xibá na' queë' Dios, pero biti' runli' ca rinná bë' xibá queë' na'.

²⁸ Biti' náquië' idú bönni' judío tu bönni' nácasë caní lu yöl-la' bönáchisö queë', ate' biti' naca idú lë na' naca bë' le narúgusö lu xipélë'ë nu bönni'.

²⁹ Náquië' idú bönni' judío bönni' na' náquië' caní lu icja ládxi'da'ahuë', en le naca idú le narugu lu xipélë'ë nu bönni' le naca bë' nu nazí'i xibá queë' Dios, naca tu le yu'u icja ládxi'do'gaca bönachi. Naca que bö' naca cázaru', en calëga que yöl-la' bönáchisö queëru'. Nu bönni' náquië' caní, biti' tun bönachi lë' bal, pero Dios caz gunë' lë' bal.

3

¹ Channö caní naca, ¿bizxi ruzi'tsë' xibé tu bönni' tu' náquië' judío? ¿Bizxi ruzi'ë xibé tu bönni' judío tu' narugu lu xipélë'ë?

² Yenni' ruzi'ë xibé, en zían ca ruzi'ë xibé. Le nácatërö lo, Dios gulu'ë lu ná'agaquië' yugu' bönni' judío didza' lá'ayi queë'.

³ Bal-lë' biti' ta'yéajlë'ë Dios. ¿Naru' réquitsenu' biti' gunë' Dios ca rnna xtídzë'ë tu' cabí ta'yéajlë'ë Lë'?

⁴ ¡Biti' ca' gaca! Ral-la' guéquibe'eru' rúntica'së' Dios ca rnna didza' bë'ë, sal-la' ta'zí' yë' yúgu'të bönachi. Ca naca queë' nazúaj lu guichi lá'ayi le rnna:

Gaca bë' nacu' tsahui' ni'a que didza' ru'u,
en uruju' tsahui' channö nu uchi'a usörö Li'.

⁵ Cate' runru' le ruá' dö', Dios rnnë' biti' naca tsahui' le runru'. Lë ni naca bë' tsahui' náquië' Dios. Nacuá' nupa ta'nná: "Le cabí naca tsahui' le runru' naca bë' náquië' Dios tsahui', ate' que lë ni na' biti' ral-la' gunë' rë'u xíguia'."

⁶ ¡Biti' ca' naca caní! La'tu' ruzi'ë xibé Dios le ruá' dö' runru', ¿nacxi caz gaca uchi'a usöröë' bönachi yödzölió ni?

⁷ Cate' nu rizi' yë', Dios rnnë' biti' ruí'i didza' nu na' ca runë' Lë'. Lë ni naca bë' naca idütë li didza' ru'ë Dios. Ta'nnë' bönni' le ta'zi' yë'ë légaquië' run ga gaca queë' Dios yöl-la' ba, ate' biti' ral-la' ichúguië' quégaquië', cabí innë' nácagaquië' bönni' dul-la'.

⁸ ¿Naru' huannátsaru': "Guá'aru' dö' para gaca le naca dxi'a"? Nupa na' ta'nnë zi' queëru' ta'nná rusédiru' caní, ate' tsahui' naca ichúguië' Dios quéguequi.

Yúgu'tëru' nabága'ru' dul-la'

⁹ ¿Bizxi caz innaru' na'a? Ca naca queëtu' netu', bönni' judío, ¿nácárotu' tsahui' ca ia'zica'rö bönachi? ¡Biti' ca' nácatu'! Chibulu'a ni, nabága'gaca dul-la' bönachi judío, ate' nabága'gaca ca' dul-la' bönachi izá'a. ¡Yúgu'të' nabága'gaquië' dul-la'!

¹⁰ Nazúaj lu guichi lá'ayi le rnna:

Cuntu nu zoa naca tsahui', cuntu nu caz.

¹¹ Cuntu nu réajni'i.

Cuntu nu riguilaj Dios.

¹² Yúgu'të' ta'dë' ga yúbölö.

Yúgu'të' nanítigaquië'.

Cuntu nu run le naca dxi'a, cuntu nu caz.

¹³ Lubá'agaquië' nácagaca ca yeru ba nayáljagaca.

Len yöl-la' rinnösö quégaquië' ta'zì' yé'enë' luzá'agaquië'.

Didza' rirúaj ruá'agaquië' naca ca le yudzu láya'ba' bëla sínia'.

14 Len yugu' didza' tu'ë, tu'didza' yúdxinë' bönachi, en ta'nnë zi'ë quégaca bönachi na'.

15 Nacu'ë sina' tútigaquië' bönachi.

16 Gátitës ga ta'dödë' tu'sunítië', en tu'saca' zi'ë luzá'agaquië'.

17 Biti' ta'zéqui'në' ila'bözë' dxí'ado'.

18 Biti' ca' tádxinë' Dios.

19 Nöziru' yúgu'të didza' ni bë'ë Dios, rë' yugu' bönni' na' dë lu ná'agaquië' xibá queë'. Que lë ni na' cuntu nu gaca inná bitì' nabaga' dul-la', ate' yúgu'të bönachi idútë yödzölió, uchi'a usöröë' Dios quéguequi.

20 Tuí'i ládxi'gaquië' yugu' bönni' judío ilunë' yugu' le rinná bë' xibá queë' Dios para ulu'huóáquië' tsahui', pero cuntu nu huóáca tsahui' caní, tu' nuzóë' Dios xibá queë' para guéquibe'eru' nabága'ru' dul-la'.

Uláru' tu' réajlë'ëru' Jesucristo

21 Na'a, chibuluí'i lahui ca gaca huóácaru' tsahui' lahuë' Dios. Biti' gaca huóácaru' tsahui' tu' runru' ca rinná bë' xibá queë' Dios, sal-la' lu xibá queë' na', en lu guichi lá'ayi ga nazúajgaca le gula'nnë' bönni' gulu'ë didza' uláz queë' Dios, ruí'i didza' ca gaca huóácaru' tsahui'.

22 Dios caz runë' ga huóácaru' tsahui' tu' réajlë'ëru' Jesucristo, ate' gunë' ga ulu'huóáca tsahui' yúgu'të nupa ila'yéajlë' Lë'. Tuz ca nácgaca yúgu'të bönachi

23 tu' núngaquië' yúgu'të' dul-la', en biti' ca' nácagaquië' tsahui' ca na' náquië' Dios idú tsahui'.

24 Dios ruzá' ládxe'ë queëru', en nunsë' rë'u tsahui' tu' böá'uë' Jesucristo rë'u.

25 Dios budödë' Jesucristo uláz queëru'. Lë' bu-laljë' xichönë', le rigúa dul-la', lë na' uzí'iru' xibé channö uyéajlë'ëru' Lë'. Caní benë' Dios para gaca bë' náquië' tsahui' Lë' sal-la' lu yöl-la' riböza zxön ladxi' queë' budödisë' cá'asö yugu' dul-la' benru' dza ni'te.

26 Caní benë' Dios, buluí'i cuinë' tsahui' dza ni zóaru' na'a, ate' rugá'anë' tsahui' sal-la' rugúë' dul-la' nabága'gaca bönachi, runë' ga tu'huöáca tsahui' nupa ta'yéajlë' Cristo.

27 ¿Naru' huácatsö gun ba zxön cuinru' ca naca queëru'? ¿Biti' ca' gácaru'! ¿Bizx que na'? Naca tu' nuláru', calëga tu' runru' ca rinná bë' xibá queë' Dios, pero tu' réajlë'ësiru' Jesucristo.

28 Na'a, rusáca'ru' queëru' nuhuöáquië' tsahui' tu bönni' tu' réajlë'ë Jesucristo, en calëga tu' runë' ca rinná bë' xibá queë' Dios.

29 Ca naca Dios, ¿náquië' Dios quégacasö bönachi judío? ¿Naru' cabí náquië' ca' Dios quégaca bönachi izá'a? Ön, náquië' ca' Dios quégaca bönachi izá'a na'

30 tu' zoa Tuz Nu naca Dios. Dios ni gunë' ga ulu'huöáquië' tsahui' yugu' bönni' judío tu' ta'yéajlë'ë Jesucristo, yugu' bönni' na' narugu lu xipëla'gaquië' lë na' naca bë' nu nequi queë' Dios, en lësca' caní gunë' ga ulu'huöáquië' tsahui' yugu' bönni' zi'tu' tu' ta'yéajlë'ë Jesucristo, en biti' narugu lu xipëla'gaquië' lë na' naca bë'.

31 Na'a, channö nuláru' tu' réajlë'ësiru' Jesucristo,

¿ba nagá'ana cá'asö xibá queë' Dios? ¿Biti' ca' naca ca', pero nagá'anarö tsutsu xibá queë' na'!

4

Le benë' Abraham rusedi rë'u

¹ ¿Bizxi caz innaru' na'a? ¿Bizxi bidéli'në' Abraham, xuz xtó'otu' netu', nácatu' judío?

² La'tu' böáquië' tsahui' Abraham tu' zoa le ben cazë' lë', gunna gun ba zxön cuinë', pero calëga lahuë' Dios.

³ Ca naca lë ni nazúaj lu guichi lá'ayi, le rnna: "Abraham guyéajlë'ë Dios, ate' que lë ni na' Dios benë' ga böáquië' tsahui' lahuë' Lë'."

⁴ Channö zoa nu bönni' runë' xichinru', le riguízxjaru'-në' biti' naca tu le ruzá' ládxi'ru' queë', pero naca tu le ral-la'ru' queë' bönni' na'.

⁵ Lësca' caní channö tu bönni' réajlë'ë Dios, sal-la' biti' bi dxin benë' bönni' na', Dios, Nu run ga ulu'huóáca tsahui' bönachi biti' nácacaca tsahui', rnnë' náquië' tsahui' lahuë' Lë' bönni' na', tu réajlë'ë Lë'.

⁶ Lësca' caní bë'ë didza' David ca náquië' bica' ba bönni', Dios rnnë' náquië' tsahui' sal-la' biti' bi dxin nunë' bönni' na'.

⁷ Caní gunné' David:

¿Bica' ba bönni' na' Dios runiti lahuë' le biti' naca tsahui' nunë',

en rugüë' yugu' dul-la' nabáguë'ë!

⁸ ¿Bica' ba bönni' na', Dios biti' rusubáguë'ë lë' xíguia' tu' nözi dul-la' benë' bönni' na'!

⁹ ¿Naru' nácacacsë' bica' ba bönni' narugu lu xipéla'gaquië' lë na' naca bë', o nácacaca ca' caní nupa na' cabí narugu lë na' lu xipéla'gaquië'?

Chigunná cázaru' böáquië' Abraham tsahui' lahuë' Dios tu' guyéajlë'ë Lë'.

10 ¿Bátaxi böáquië' tsahui' caní Abraham? ¿Naru' guca cate' ni' chinarugu lu xipélë'ë lë na' naca bë', o guca zí'alö? Biti' guca cate' chinarugu lu xipélë'ë, pero zí'alö guca.

11 Abraham guyéajlë'ë Dios cate' ni' bití narúguni lu xipélë'ë lë na' naca bë'. Gudödi na' gurugu lu xipélë'ë lë na' naca bë', le rulu'isö chinuhuöáquië' tsahui' lahuë' Dios. Guca caní para gáquië' Abraham ca xúzgaquië' yugu' bönni' ila'yéajlë'ë Dios sal-la' bití narugu lu xipéla'gaquië' lë na' naca bë'. Tu' ta'yéajlë'ë Dios, huáca innë' Dios nácagaquië' tsahui' lahuë' Lë'.

12 Náquië' Abraham xuz xtó'ogaquië' yugu' bönni' judío ta'yéajlë'ë Dios. Calégasö náquië' xúzgaquië' bönni' na' narugu lu xipéla'gaquië' lë na' naca bë', pero lësca' náquië' xúzgaquië' bönni' na' tunë' ca benë' Abraham, ta'yéajlë'ë Dios ca na' benë' Abraham cate' ni' bití narúguni lu xipélë'ë lë na'.

Le guzxí' lu në'ë Dios gata' queëru' tu' réajlë'ëru' Lë'

13 Guzxí' lu në'ë Dios bi unödzejë' queë' Abraham, en quégaca zxí'ini xi'sóë', gata' quégaquië' la' yödölió nisö. Gaca caní, caléga tu' tunë' ca rinná bë' xibá queë' Dios, pero tu' nuhuöácagaquië' tsahui' lahuë' Lë' tu' ta'yéajlë'ë Lë'.

14 La'tu' gata' yödölió ni quégacasö nupa tun ca rinná bë' xibá queë' Dios, bití gun bayudxi nu tséajlë' Lë', ate' nítisö gaca le guzxí' lu në'ë Dios.

15 Rulu'í xibá queë' Dios rë'u nabága'ru' xíguia', le run ga ichúguië' Dios queëru' gátiru'. Ga ni' bití' ridxini xibá queë' na', bití' gaca ila'dá'baga' bönachi le rinná bë' xibá na'.

16 Que lë ni na' uzí'iru' xibé le guzxí' lu nëë Dios tu' réajlë'ëru' Lë', para gaca bë' naca tu le ruzá' ládxë'ë queëru'. Caní naca, para gaca bë'da' gata' quéguequi yúgu'të zxí'ini xi'sóë' Abraham lë na' guzxí' lu nëë Dios, calégasö quégaquië' bönni' na' dë lu ná'agaquië' xibá queë' Dios, pero lësca' quégaca nupa ta'yéajlë' Dios ca na' guyéajlë'ë Abraham Dios. Abraham na' náquië' ca xuz xtó'oru' yúgu'tëru' rë'u, réajlë'ëru'-në' Dios.

17 Caní náquië' ca na' nazúaj lu guichi lá'ayi, le rna: "Nuzóa' li' ca xúzgaca bönachi idútë yödzölió."

Caní naca, lahuë' Dios, Nu na' guyéajlë'ë Abraham, náquië' xuz gudödi queëru' yúgu'tëru'. Dios ni rusubanë' nupa chinátigaca, en ru'ë didza' que nu bití' zuíni tsca chizóa caz nu na' bití' zuíni.

18 Caní naca tu' gudxë' Dios Abraham na': "Ziántërö ila'cuá' zxí'ini xi'sú'." Abraham guyéajlë'ë Dios, en benë' löza lë na' guzxí' lu nëë Dios, sal-la' bití' guca ilé'enë' lë na' runë' löza, ate' caní guca, bidéli'në' náquië' xúzgaca bönachi idútë yödzölió.

19 Bití' guca Abraham chopá ládxë'ë ca na' réajlë'ë Dios, sal-la' chiyu'ë ca tu gayuá' iz, en yöjnenë' ca naca que le naca cazë', chinati caz tu' chinagúladë'ë, enca' ca naca queënu Sara queë', nácanu nigula huödx.

20 Bití' guca chopá ládxë'ë, en bití' gúquië' tu' caréajlë' ca naca le guzxí' lu nëë Dios gunë' queë',

pero bidipa ládxe'ë tu' guyéajlë'ë Dios, ate' gulu'ë Dios yöl-la' ba.

²¹ Idú ládxe'ë benë' löza Dios, napë' yöl-la' huáca gunë' idütë læ na' guzxi' lu në'ë.

²² Que læ ni na', tu' guyéajlë'ë Abraham Dios, Dios buzóë' queë' náquië' tsahui'.

²³ Nazúaj lu guichi lá'ayi le rnna: "Dios buzóë' queë' náquië' tsahui'." Nazúaj lu guichi caní, calégasö para uzi'ë xibé Abraham,

²⁴ pero para uzi'iru' xibé ca' rë'u. Rë'u ni, Dios gunë' ga huóácaru' tsahui' lahuë' Lë' channö uyéajlë'ëru' Lë', busubanë' Xanru' Jesús lu yöl-la' guti.

²⁵ Jesús na', Dios budödë' Lë' para gútië' tu' nözi dul-la' nabága'ru', ate' busubanë' Lë' lu yöl-la' guti, para gaca gunë' ga huóácaru' tsahui' lahuë' Lë'.

5

Le rata' queëru' tu' rnnë' Dios nuhuóácaru' tsahui'

¹ Na'a, rnnë' Dios nuhuóácaru' tsahui' lahuë' Lë' ni'a que le benë' Xanru' Jesucristo, channö réajlë'ëru' Lë', ate' que læ ni na' nuhuóácaru' tuz len Lë'.

² Tu' réajlë'ëru' Jesucristo, ruzi'iru' xibé le ruzá ládxe'ë Dios queëru', le rutipa ládxi'ru'. Rudzéjaru' tu' runru' löza uzi'iru' ca' xibé yöl-la' zxön queë' Dios.

³ Calégasö caní rudzéjaru', pero rudzéjaru' ca' cate' riguí'i rizáca'ru', tu' chinöziru' le riguí'i rizáca'ru' rusedi rë'u cózaru' zxön ladxi'.

⁴ Cate' ribózaru' zxön ladxi' rurúajru' tsahui' lahuë' Dios, en cate' chinurúajru' tsahui' runru' löza Lë' gácalen cazë' rë'u.

⁵ Cate' runru' löza Lë', biti' ca' raca chopá ládxi'ru'. Caní naca, tu' nuhuóla' nudzë'e icja ládxi'do'oru' yöl-la' nadxí'i queë' Dios rë'u. Runë' Dios Bö' Lá'ayi, Bönni' gusöl-lë'ë Dios queëru' ga raca caní.

⁶ Cate' ni' biti' ca' guca uláru' rácasö queëru', cate' gúla'rö dza queë', Cristo gútië' uláz queëru', ni nácaru' bönachi dul-la'.

⁷ Cuntu nu guë'ëni gati uláz queë' tu bönni' tsahui'. Nadxi ca' nu urugui gati uláz queë' tu bönni' náquië' idú dxi'a.

⁸ Dios rulu'inë' rë'u ca nadxí'ide'enë' rë'u, tu' gútië' Cristo uláz queëru' cate' ni' nácaru' bönni' dul-la'.

⁹ Chinuhuóácaru' tsahui' lahuë' Dios tu' bulaljë' Cristo xichönë', gútië' uláz queëru'. Que lë ni na' chinácada' löza usölë' Lë' rë'u lu dza ichúguië' Dios quegaca bönachi dul-la' gátigaca.

¹⁰ Cate' ni' biti' rilé'eru'-në' Dios dxi'a, gútië' Zxí'inë' Dios uláz queëru' para huóácaru' tuz len Lë'. Na'a, tu' zoë' nabanë', en chinuhuóácaru' tuz len Lë', chinácada' löza uláru'.

¹¹ Rudzëjaru' lahuë' Dios ni'a que le benë' Xanru' Jesucristo, tu' nuhuóácaru' tuz len Dios ni'a que lë na' benë' Lë'.

Le benë' Adán, en le benë' Cristo

¹² Guyú'u dul-la' yödzölió ni tu' nözi le benë' tuzë' bönni', ate' tu' benë' dul-la', guyú'u ca' yöl-la' guti. Que lë ni na' ilátigaca yúgu'të bönachi tu' nabága'gaca yúgu'të bönachi dul-la'.

13 Zí'atëlö ga bidxintë xibá queë' Dios, gulún bönachi yödzölió ni dul-la', pero bití' busubáguë'ë Dios bönachi na' xíguia' ca nupa ta'dá'baga' xibá queë' tu' nözi dul-la' na', tu' bití' ridxini xibá queë' quégaquië'.

14 Ga gudela' zoë' Adán ga bidxintë zoë' Moisés gulati yúgu'të bönachi tu' gula'baga' dul-la', sal-la' bití' gula'dá'baga' tu le gunná bë'ë Dios ca benë' Adán. Nácagaca yúgu'të bönachi tuz len Adán tu' nácagaca zxí'ini xi'sóé'. Lë ni rulu'i rë'u ca ilaca tuz len Cristo yúgu'të nupa ila'yéajlë' Lë'.

15 Le rúnнасë' queëru' Dios bití' naca ca le guca queëru' tu' nözi dul-la' benë' Adán. Tu' nözi dul-la' benë' tuzë' bönni', ilátigaca yúgu'të bönachi. Dxí'atërö naca le ruzá' ládxe'ë queëru' Dios, en le rúnнасë' queëru'. Ruzá' ládxe'ë queëru' lë ni ni'a que le benë' yetuzë' Bönni', Jesucristo.

16 Le rúnнасë' Dios queëru' bití' naca ca le guca queëru' tu' nözi dul-la' na' benë' tuzë' bönni' na'. Le guchúguië' Dios queë' Adán gátie' tu' nözi dul-la' na' benë', guchúguië' ca' Dios quégaca yúgu'të bönachi gátigaca. Le rúnнасë' Dios queëru' naca para huöácaru' tsahui' lahuë' Lë' sal-la' nabága'ru' dul-la' zían.

17 Guyú'u yöl-la' guti tu' nözi dul-la' benë' tuzë' bönni'. Nácatërö löza ila'deli' yöl-la' na'bán nupa ulu'huöáca tsahui' lahuë' Dios tu' zoa le ruzá' ládxe'ë queëru' Dios ni'a que le benë' yetuzë' Bönni', Jesucristo.

18 Dios guchúguië' quégaca yúgu'të bönachi ilátigaca tu' nözi dul-la' benë' tuzë' bönni' na'. Lësca' caní gaca ulu'huöáca tsahui' yúgu'të bönachi

ni'a que le naca tsahui' benë' yetuzë' Bönni' na', gata' yöl-la' na'bán idú quégaquië'.

¹⁹ Bulu'huóáca huen dul-la' bönachi zián tu' cabí benë' tuzë' bönni' ca rnaa xtídzë'ë Dios. Lësca' caní ulu'huóáca tsahui' bönachi tu' benë' yetuzë' Bönni' na' ca rnaa xtídzë'ë Dios.

²⁰ Guyú'u xibá queë' Dios yödzölió ni para gaca bë'da' nabága'gaca bönachi dul-la'. Tu' guca bërö nabága'gaca dul-la', guca bërö ca' zxöntëro naca le buzá' ládxe'ë Dios quégaca bönachi.

²¹ Guta' yöl-la' huáca unná bë' que dul-la' guti rë'u. Lësca' caní le ruzá' ládxe'ë Dios queëru' napa yöl-la' huáca gun ga huóácaru' tsahui' lahuë' Lë', ate' gata' yöl-la' na'bán idú queëru' ni'a que le benë' Xanru' Jesucristo.

6

Naca tsca chinátiru' para cabirö gunru' dul-la' tu' nabániru'-në' Jesucristo

¹ ¿Bizxi caz innaru' na'a? ¿Naru' gúntsaru' dul-la' para gáta'rö queëru' le ruzá' ládxe'ë Dios queëru'?

² ¡Biti' gun cázaru' ca! Naca queëru' ca tsaz chinati cázaru' para cabirö gunru' dul-la'. ¿Naru' gúntica'siru' dul-la'?

³ ¿Naru' cabí nözili' ca na' naca queëru'? Channö bidílaru' nisa para huóácaru' tuz len Cristo, lë na' bidílaru' nisa rulu'i rë'u chigudódiru' lu yöl-la' guti tsözxön len Lë'.

⁴ Ca na' guca, gútilenru'-në' Cristo tsözxön, lësca' caní bigáchi'lenru'-në' tsözxön niu' yeru ba cate' ni' bidílaru' nisa. Ca na' busubanë' Dios Cristo lu yöl-la' guti len yöl-la' huáca zxön queë', lës caní ca' rë'u

nubánlenru'-në' Jesús tsözxón para gácaru' bönachi idútë cubi queë'.

⁵ Channö nunru' Cristo tsözxón, gútiru' ca na' gútië' Lë', lësca' caní gunru'-në' tsözxón, ubanru' lu yöl-la' guti ca na' bubanë' Lë'.

⁶ Chinöz quéziru' lë ni, yöl-la' bönachi queëru' le guzóa zí'alö gudá'len Lë' tsözxón lë'e yaga cruz, para initi yöl-la' bönachi queëru' na' bënlenru' le dul-la', para cabirö inná be'e le naca dul-la' rë'u.

⁷ Channö nácaru' tuz len Nu na' guti tu' nözi dul-la', nuhuóácaru' tsahui' lahuë' Dios tu' cabirö nabága'ru' dul-la' na', ate' bíti'rö yú'uru' lu na' dul-la'.

⁸ Na'a, channö nátilenru'-në' Cristo tsözxón, réajlë'ëru' ubánlenru'-në' ca' tsözxón,

⁹ tu' chinöziru' bubanë' Cristo lu yöl-la' guti, en bíti'rö gátie'. Que lë ni na' bíti'rö bi gaca gun yöl-la' guti na' queë' Lë'.

¹⁰ Ca na' guca, gútië' Lë', tu luzuísö gútië' tu' nözi dul-la' quégaca yúgu'të bönachi, pero ca na' naca, zoë' nabanë', nabánlenë' Dios.

¹¹ Lësca' caní ral-la' usáca'li' queëli' naca queëli' ca chinati cázali' para cabirö gunli' dul-la', pero zóali' nabanli' para gunli' ca rnaa xtídzë'ë Dios tu' nácali' tuz len Xanru' Jesucristo.

¹² Que lë ni na', bití' gü'ili' lataj le naca dul-la', para cabí gun ga gunli' dul-la' lu le naca cázali' le gati caz. Biti' gunli' ca naca le rizé ládxi'li' le ruá' dö', lu le naca cázali'.

¹³ Biti' udödi cuinli' lu dul-la', bití' gunli' le ruá' dö', pero guli'dödi cuinli' lu në'ë Dios tu' nubanli' lu yöl-la' guti, en guli'dödi lu në'ë idútë le naca cázali' para ugúnlenë' le le naca dxi'a.

14 Biti' güí'ili' lataj le naca dul-la', para cabí gun ga gunli' dul-la', tu' nuzóë' Dios libí'ili', calëga para inná be'e libí'ili' xibá queë', pero para inná be'e libí'ili' le ruzá' lãdxë'ë queëru'.

Le rucudzu' didza' ca naca que nu bönni' nadó'o

15 ¿Bizxi caz innaru' na'a? ¿Naru' gúntsaru' dul-la' tu' cabirö rinná be'e xibá queë' Dios rë'u, pero rinná be'e le ruzá' lãdxë'ë Dios rë'u? ¡Biti' ca' gunru' caní!

16 Chinöz quézili' dxi'a channö udödi cuinli' lu në'e nu bönni' para gácali' bönni' nadó'ogaca queë', en gunli' ca rnna xtídzë'ë, tsaz nácali' bönni' nadó'ogaca queë' bönni' na' runli' ca rnna xtídzë'ë. Lëscá' caní gaca channö udödi cuinli' para gunli' dul-la' le gun ga gátili', o channö udödi cuinli' para gunli' ca rnna xtídzë'ë Dios, Nu gun ga huöácali' tsahui'.

17 Na'a, ¡Xclenë' Dios! Sal-la' zí'alö gúcali' bönni' nadó'ogaca lu na' dul-la', na'a idú lãdxi'li' runli' ca rinná bë' xibá na' budödi cuinli' lu në'e.

18 Tu' chinulali' lu na' dul-la', nuhuöácali' ca yugu' bönni' nadó'ogaca lu na' le naca dxi'a.

19 (Ruí'ilena' libí'ili' didza' ca tuí'i didza' bönachi, tu' cabí réajni'ili' idútë lu yöl-la' bönachi queëli'.) Zí'alö budödi cuinli' len idútë le naca cázali' lu na' le ruá' dö', en lu na' le cabí naca tsahui', atë' gúcali' ca yugu' bönni' nadó'ogaca lu në'eguequi, en benli' xichini le ruá' dö' na'. Na'a, guli'dödi idútë le naca cázali' lu na' le naca tsahui', para gácali' ca yugu' bönni' nadó'ogaca lu në'e, en gunli' xichini lë na' naca tsahui' para gácali' bönachi narúajgaca quez queë' Dios.

²⁰ Cate' ni' nácali' ca yugu' bönni' nadó'ogaca lu na' dul-la', biti' benli' xichini le naca tsahui'.

²¹ Na'a, ¿naru' buzí'itsali' xibé lë na' benli' zí'alö? Na'a lë na' benli' run ga rutuí'ili', en run ga nu gati tsaz.

²² Na'a chinulali' lu na' dul-la', en nácali' ca yugu' bönni' nadó'ogaca queë' Dios, en ruzí'ili' xibé le run ga nácali' bönachi narúajgaca quez queë' Dios, en le run ga dë queéli' yöl-la' na'bán idú.

²³ Lazzaj nu run dul-la' naca yöl-la' guti, pero le rúnasë' Dios queëru' naca yöl-la' na'bán idú, le rata' queëru' tu' nácaru' tuz len Xanru' Jesucristo.

7

Le rucudzu' didza' yöl-la' nutsaga na'

¹ Bõcha'ado', núlöli' núnbë'ëli' xibá queë' Dios. Nöz quézili' rinná be'e xibá na' nu bönni' tsanni ni zoë' nabanë'.

² Naca queéli' ca naca que tu nigula nutsaga ná'lennu-në' bönni', yú'unu lu në'ë bönni' queënu tsanni ni zoë' nabanë' ca rinná bë' xibá que yöl-la' nutsaga na', pero channö chinátië', nurúajnu lu na' xibá na'.

³ Caní naca, tsanni ni zoë' nabanë' bönni' queënu, channö utsaga ná'lennu-në' ia'tué' bönni', gunnu dul-la' le riguitsaj xibá que yöl-la' nutsaga na', pero channö chinátië' bönni' queënu na', nurúajnu lu na' xibá na', ate' na'a, channö utsaga ná'lennu-në' nu bönni' yúbölö, biti' gunnu dul-la' le riguitsaj xibá que yöl-la' nutsaga na'.

⁴ Lësca' caní raca queéli', bõcha'a. Tu' dzágali'-në' Cristo chinati cázali' libí'ili' para cabirö inná be'e libí'ili' le rinná bë' xibá na', para guéquili' que Nu

yúbölö. Na'a chinéquili' queë' Cristo, Nu na' bubán lu yöl-la' guti. Caní naca, para gaca gunru' le raza ládxi'ë Dios.

⁵ Tsanni ni' guyú'uru' lu na' yöl-la' bönáchisö queëru', le rinná bē' xibá na' ben ga gulaca bē' le guzē ládxi'ru' le ruá' dö', le gulún dxin lu idútē le naca cázaru' para ilún ga gátiru'.

⁶ Na'a nuláru' lu na' xibá na' tu' nati cázaru' tscá naca le rinná bē' xibá na' gunná be'e rē'u zí'alö. Caní naca para gaca gunru' xichinē' Dios lu yöl-la' na'bán cubi le runnē' queëru' Dios Bō' Lá'ayi, en calēga gunru' xichinē' lu lē na' chinaca gula, le naca xibá na'.

Le dzaga neda' le naca dul-la'

⁷ ¿Bizxi caz innaru' na'a? ¿Naru' runtsö xibá queë' Dios ga runa' dul-la'? ¡Biti' ca' run caní! La'tu' cabí buzéajni'i le rinná bē' xibá na' neda', bití' gunözda' naca dul-la' le runa'. La'tu' cabí zoa lu xibá na' le rna: "Biti' sē ládxi'u le dē que luzó'o", bití' gunözda' naca dul-la' yöl-la' rizē ládxi' le dē que luzá'a.

⁸ Cate' bidxín quia' xibá na', guca bē' le naca dul-la' na' run dxin lu idútē le naca', atē ben ga gúquibe'eda' rizē ládxi'a yúgu'tē le ruá' dö'. Ga bití' ridxini xibá na', bití' naca bē' le naca dul-la'.

⁹ Dza ni'te, zí'atēlö ga bidxín quia' xibá queë' Dios, ni' gúquida' zoa' nabana', pero cate' bidxín quia' xibá na', gúquibe'eda' nabága'a dul-la', en chinati caza'.

¹⁰ Dios gunná bē'ë xibá na' para gun ga gata' queëru' yöl-la' na'bán, pero ben ga gúquibe'eda' chinati caza'.

11 Guca bë' nazi' yé'eda' ca naca dul-la', tu' ben xibá na' ga gúquibe'eda' nabága'a dul-la', en ral-la' gátia'.

12 Que læ ni na', lá'ayi naca xibá queë' Dios, ate' lá'ayi, en tsahui', en dxi'a naca le gunná bë'ë.

13 ¿Naru' bentsö læ na' naca dxi'a ga bidxín quia' yöl-la' guti? ¡Biti' ca' naca ca'! Le naca dul-la' bugún dxin læ na' naca dxi'a, en ben ga gúquibe'eda' chinati caza' para gaca bë' naca dul-la' le runa'. Caní guca, para gaca bë' ni'a que xibá na' nácatëro xihui' yúgu'të le naca dul-la'.

14 Nöziru' Dios Bö' Lá'ayi bennë' queëru' xibá na', pero neda' naca' bönáchisö, en yu'a lu na' dul-la' ca tu bönni' nadó'o que.

15 Na'a, biti' réajni'ida' le runa'. Ré'ënda' guna' ca rinná bë' xibá na', pero biti' runa' læ na' ré'ënda' guna'. Le naca dul-la' le cabí rilé'eda' dxi'a, læ na' runa'.

16 Runa' dul-la' sal-la' biti' ré'ënda' guna' dul-la' na'. Xibá na' rusëdi neda' naca dul-la' le cabí naca dxi'a. Que læ ni na' naca bë'da' naca dxi'a le rinná bë' xibá na'.

17 Caní naca, calëga néda'sö runa' dul-la' na', pero dul-la' na' dzaga neda' run ga runa' dul-la' na'.

18 Nözda' biti' zóalen neda' le naca dxi'a, o huáca innía', læ na' naca dxi'a biti' zóalen le naca yöl-la' bönáchisö quia'. Ré'ënda' guna' le naca dxi'a, pero la' néda'sö biti' gaca guna' læ na' naca dxi'a.

19 Biti' runa' le naca dxi'a le ré'ënda' guna', pero rúntica'sa' le biti' naca dxi'a le cabí ré'ënda' guna'.

20 Que læ ni na', channö runa' dul-la' na' biti' ré'ënda' guna', calëga neda' caz runa' le, pero dul-

la' na' dzaga neda' run ga runa' dul-la' na'.

²¹ Caní naca le raca queëru' yúgu'tëru'. Cate' rë'ëni'ru' gunru' le naca dxi'a, dzaga rë'u le run ga runru' le ruá' dö'.

²² Lu icja ládxi'da'ahua' raza ládxa'a xibá queë' Dios

²³ pero réquibe'eda' dzaga idútë le naca' le rinná be'e neda', ate' lë ni ridá'baga' xibá queë' Dios yu'u icja ládxi'da'ahua'. Lë na' dzaga idútë le naca' run ga runa' dul-la'.

²⁴ ¡Bica' bayechi' neda'! ¿Nuzxi caz gaca usölä neda' lu yöl-la' bönáchisö quia' le run ga runa' dul-la'?

²⁵ ¡Xclenë' Dios, chinularu' na'a ni'a que le benë' Xanru' Jesucristo! Que lë ni na', tsca naca le yu'u icja ládxi'da'ahua' runa' ca rinná bë' xibá queë' Dios, sal-la' yöl-la' bönáchisö quia' run ga rë'ënda' guna' dul-la'.

8

Le runru' tu' zóalenë' Dios Bö' Lá'ayi rë'u

¹ Que lë ni na', bíti'rö bi xíguia' nabága'gaquië' yugu' bönni' néquiguequinë' queë' Jesucristo, bönni' na' bíti'rö tunë' ca rë'ëni' yöl-la' bönáchisö quégaquië', pero ca rë'ëné' Dios Bö' Lá'ayi tunë'.

² Tu' naca' tuz len Jesucristo, Dios Bö' Lá'ayi, Nu na' nabániru', rácalenë' neda'. Que lë ni na', nulá' lu lë na' ben ga bena' dul-la', enca' lu yöl-la' guti.

³ Chinunë' Dios le cabí guca gun xibá na', tu' cabí bi guxzéqui' gun tu' nácaru' bönáchisö. Dios gusöl-lë'ë Zxi'ini cazë', ate' guljë' bönachi ca nácaru' rë'u, nácaru' bönachi dul-la', pero bití' bi dul-la' benë' Lë'. Busubaga' cuinë' dul-la' nabága'ru' rë'u, ate'

caní guca, guchúguië' que dul-la' runru' lu yöl-la' bönáchisö queëru'.

4 Caní benë' para gaca gunru' idútë le naca tsahui' le rinná bë' xibá queë', núlöru' na' bití'rö runru' ca rë'ëni yöl-la' bönáchisö queëru', pero ca rë'ënë' Dios Bö' Lá'ayi runru'.

5 Bönni' tunë' ca rë'ëni yöl-la' bönáchisö quégaquië', tu'i ládxi'gaquië' le naca que yöl-la' bönáchisö quégaquië', pero bönni' tunë' ca rë'ënë' Dios Bö' Lá'ayi, tu'i ládxi'gaquië' le naca queë' Dios Bö' Lá'ayi.

6 Channö ru'i ládxi'siru' le naca que yöl-la' bönáchisö queëru', tsaz gátiru', pero channö ru'i ládxi'ru' le naca queë' Dios Bö' Lá'ayi, chidë yöl-la' na'bán idú queëru', en ribözaru' dxi ladxí'.

7 Núti'tës nu ru'i ládxi'sö le naca que yöl-la' bönáchisö que, bití' rilé'e Dios dxi'a, tu' cabí run nu na' ca rinná bë' xibá queë' Dios, en bití' ca' gaca gun caní.

8 Que lë ni na', bönni' na' tunë' ca rë'ëni yöl-la' bönáchisö quégaquië' bití' gaca ilunë' le raza ládxi'ë Dios.

9 Na'a, bití'rö runli' ca rë'ëni yöl-la' bönáchisö queëli', pero runli' ca rë'ënë' Dios Bö' Lá'ayi tu' zóalen cazë' Lë' libí'ili'. Tu bönni' bití' zóalenë' Dios Bö' Lá'ayi lë', Nu na' risöl-lë'ë Cristo queëru', bití' néquinë' queë' Cristo.

10 Tu' zóalenë' Cristo libí'ili', chinati caz idútë le guca cázali' tu' nözi dul-la', ate' na'a nabánili'-në' Dios Bö' Lá'ayi tu' nunë' Dios libí'ili' tsahui'.

11 Bö' Lá'ayi queë' Dios, Nu na' busubán Jesús lu yöl-la' guti, zóalenë' libí'ili'. Lë cazë' Dios, Nu busubán Jesucristo lu yöl-la' guti, runë' ga nubanli'

lu idútë le gúcali' le rati caz. Caní nunë' tu' zóalenë' Dios Bö' Lá'ayi libí'ili'.

¹² Que lë ni na', libí'ili' böcha'a, dë tu le ral-la'ru', pero calëga que yöl-la' bönáchisö queëru', para cabirö gunru' ca rë'ëni yöl-la' bönáchisö queëru' na'.

¹³ Channö runli' ca rë'ëni yöl-la' bönáchisö queëli', gátili' tsaz, pero channö len yöl-la' huáca queë' Dios Bö' Lá'ayi runli' ga ila'niti le runli' lu yöl-la' bönáchisö queëli', gata' yöl-la' na'bán idú queëli'.

¹⁴ Yúgu'të nupa tun ca rë'ënë' Dios Bö' Lá'ayi náacagaca zxí'inë' Dios.

¹⁵ Dios Bö' Lá'ayi na' zóalenë' libí'ili' biti' nuzóë' libí'ili' leyúbölö ca bönni' nadó'ogaca para gadxi idzöbili', pero chinunë' ga nácali' zxí'inë' Dios caz, en runë' ca' ga rulídzaru'-në' Dios, rnnaru': "Abba", le rnna: Dad.

¹⁶ Lë cazë' Dios Bö' Lá'ayi ruzéajni'inë' bö' naca cázaru', en runë' ga nöziru' nácaru' zxí'inë' Dios.

¹⁷ Channö chinácaru' zxí'inë' Dios, gata' ca' queëru' tsözxön len Cristo le nequi queë' Xúziru' Dios. Caní gaca queëru' channö riguí'i rizáca'lenru'-në' tsözxön Cristo para uzí'iru' xibé tsözxön len Cristo yöl-la' zxön queë' Dios.

¹⁸ Runi neda', yugu' lë ni riguí'i rizáca'ru' na'a naca tu le cuídido'os tsca naca yöl-la' zxön na' gata' queëru' dza si' za'.

¹⁹ Ta'böza yúgu'të le nunë' Dios, en ta'zë ládxi'gaca idxintë dza na' ulu'ë lahui Dios yugu' bönni' náacagaquië' zxí'ini cazë'.

²⁰ Yúgu'të lë na' nunë' Dios gula'dödi lu na' le run ga ila'niti, calëga tu' gulë'ëni caz gaca caní, pero tu'

benë' Dios ga naca caní. Benë' ca' ga naca löza que idútë læ na' nunë',

²¹ ate' ulu'lágaca yúgu'të le nunë' Dios lu læ na' run ga ila'niti. Caní gaca, yúgu'të læ na' ulu'zí' ca' xibé yöl-la' rusölá le nazáca'da' na' ulu'zi'ë xibé yugu' zxi'inë' Dios.

²² Nöziru' ta'guí'i ta'zaca' yúgu'të le nunë' Dios ga ridxintë na'a dza, ca na' riguí'i rizáca'nu tu nigula chizóa sóabi' bí'ido' queënu.

²³ Riguí'i rizáca'a, calëgasö yödzölió ni, pero riguí'i rizáca'ru' ca' rë'u, sal-la' zóalenë' Dios Bö' Lá'ayi rë'u, Nu na' naca queëru' le rulu'i rë'u ca ral-la' gaca cázaru'. Riguí'i rizáca'ru' tsanni ni ribózaru' dza ni' ulu'ë lahui Dios nácaru' idú zxi'inë', dza ni' ünë' ca' idútë le naca cázaru'.

²⁴ Tu' runru' löza læ ni, nuláru' rë'u, pero channö gaca ilé'ëru' læ na' runru' löza, bití' naca tu le ribózaru'. Bití' ribózaru' le chirilé'ëru'.

²⁵ Na'a, channö runru' löza tu le cabí gaca ilé'ëru', lu yöl-la' riböza zxon ladxi' ribózaru' le.

²⁶ Lësca' caní rácalenë' Dios Bö' Lá'ayi rë'u cate' rudú ládxi'ru', tu' cabí nöziru' bi ral-la' inábiru'në' Dios, pero Lë cazë' Dios Bö' Lá'ayi rudödë' xtídza'ru' lahuë' Dios, ate' lu yöl-la' rinaba yudxi queë' rinnëda' ládxi'ë, tsca cabí gaca nu inná.

²⁷ Dios ruyúë' le yu'u icja ládxi'do' gaca bönachi, en nözinë' le rë'ënë' innë' Dios Bö' Lá'ayi na', ate' Lë', ca rë'ëni quëzinë' Dios, rudödë' xtídza' gaca nupa néquigequi quez queë' Cristo lahuë' Dios.

Nadéli'tëröru' tu' zóalenë' Cristo rë'u

²⁸ Nöziru' tu'zi'ë xibé bönni' yúgu'të le raca quëgaquië', bönni' na' nadxi'iguequinë' Dios, ate' bulidzë' Dios légaquië' ca nuzóa cazë' gunë'.

29 Yugu' bönni' na' gurõ cazë' queë' Dios zí'atëlö, buzóë' ca' quégaquië' zí'atëlö ilácagaquië' ca naca cazë' Zxí'inë', para gáquië' Zxí'inë' lo ladaj zián böchë'ë.

30 Nupa na' buzóë' Dios quégaquië' zí'atëlö ca ral-la' ilácagaquië', bulidzë' ca' légaquië', ate' yugu' bönni' na' bulidzë', benë' légaquië' tsahui', ate' yugu' bönni' na' benë' légaquië' tsahui', benë' ga tu'zi'ë ca' xibë yöl-la' zxön queë'.

31 ¿Bizxi caz innaru' na'a ca nácgaca lë ni? Channö rácalenë' Dios rë'u, biti' ral-la' gádxiru' sal-la' bi ilún bönachi queëru'.

32 Dios, idú ládxe'ë bennë' queëru' Zxí'ini cazë'. Budödë' lë' para gútië' uláz queëru'. Channö caní benë' Dios, ¿naru' cabí gúnnadë'ë queëru' tsözxön len Zxí'inë' yúgu'të le dë?

33 ¿Nuzxi caz gaca bi usubaga' nupa na' gurõ cazë' queë' Dios? ¿Cuntu nu gaca, tu' run cazë' Dios ga nuhuóácaru' tsahui'!

34 ¿Nuzxi caz gaca ichugu queëru' gátiru'? ¿Cuntu nu gaca, tu' guti cazë' Cristo uláz queëru', en le nácarö lo, bubanë' lu yöl-la' guti, ate' na'a zoë' cuita lë'ë ibëla Dios ga nácatërë' zxön, ate' rnnë' dxi'a uláz queëru' lahuë' Dios!

35 Sal-la' bi raca queëru', nöz quéziru' nadxí'inë' Cristo rë'u. Nöziru' nadxí'inë' rë'u: sal-la' riguí'i rizáca'ru', o sal-la' risëbi ládxi'ru', o sal-la' ta'bía ládxi'gaca bönachi rë'u, o sal-la' ridunru', o sal-la' riyadzaj le gácuru', o sal-la' zoa bönadxi queëru', o sal-la' ilútië' bönni' rë'u.

36 Ca nácgaca lë ni nazúaj lu guichi lá'ayi, rnna: Tu' néquitu' quiu' Li', túntica'sö bönachi ga gátitu'.

Nácatu' ca yugu' bö'cu' zxila',
nadödigacaba' lu na' nu guti légacaba'.

³⁷ Na'a, tu' zóalen rë'u Nu na' nadxí'i rë'u,
nácaterö löza idéli'ru' lu le raca queëru'.

³⁸⁻³⁹ Que lë ni na' runi neda':

Biti' bi sequi' gun ga bíti'rö idxí'inë' Dios rë'u.
Nadxí'inë' rë'u tu' néquiru' queë' Xanru' Jesucristo.
Biti' sequi' gun caní yöl-la' guti o yöl-la' na'bán,
o yugu' gubáz lá'ayi o nupa ta'nná bé',
o yugu' yöl-la' huáca que tu' xihui',
o bíti'tës bi zoa o bíti'tës bi si' za',
o tu le dë xitsá'alö o tu le dë cadxí'ilö,
o bíti'tës bi nunë' Dios.

9

Dios gurö cazë' queë' bönachi Israel

¹ Ruá'a didza' idútë li tu' néquida' queë' Cristo,
ate' röjloz didza' ni le naca queë' Dios Bö' Lá'ayi le
yu'u icja ládxi'da'ahua'. ¡Biti' rizi' yë'a!

² Ruhuí'inide'eda', en risëbitica'sö ládxa'a

³ tu' raca ládxa'a guna' ga ulu'lë' böchi' luzá'a,
bönni' uládz quia'. La'tu' huácalen légaquië', guë'ëni
quézida' ubéaj ládxe'ë Dios neda', en ulá'alena'
Cristo.

⁴ Yugu' bönni' uládz quia' na' nácagaquië'
zxí'ini xi'sóë' Israel, ate' Dios bë'ë légaquië' lataj
ilácagaquië' zxí'ini cazë'. Yöl-la' zxön queë' Dios
guzóalen légaquië', ate' Dios budödë' lu ná'agaquië'
didza' rucá'ana tsahui', enca' xibá queë'. Bulidzë'
légaquië' para tseaj ládxi'gaquië' Lë', ate' budödë'
lu ná'agaquië' yugu' le guzxí' lu në'ë gunë' le ilún
tsahui' bönachi.

5 Nácagaquië' xzí'ini xi'sóagaquië' xuz xtó'otu' Abraham, en Isaac, en Jacob, ate' ladaj di'a dza quégaquië', ca naca yöl-la' bönachi queë', guljë' Cristo, Nu naca caz Dios, en rinná bé'enë' yúgu'të. ¡Rácatica'sö queë' yöl-la' ba! ¡Ca' gaca!

6 Sal-la' yúgu'të bönni' uládz quia' biti' nazí' lu ná'agaquië' Cristo, biti' ral-la' innaru': Nítisö böáca xtídzë'ë Dios. Calëga yúgu'të xzí'ini xi'sóë' Israel nácagaquië' idú bönachi Israel, nupa néquiquequi queë' Dios.

7 Sal-la' gúljagaquië' zían xzí'ini xi'sóë' Abraham, biti' guláquië' yúgu'të' idú xzí'ini xi'sóë' Abraham, pero guca ca na' nazúaj lu guichi lá'ayi, le rnna: "Yugu' xzí'ini xi'sóë' Isaac ilaca idú xzí'ini xi'sú'."

8 Caní naca, nupa nácagaca xzí'inë' tu bönni' néquinë' queë' Dios, calëga yúgu'të' nácagaquië' xzí'inë' Dios. Lësca' caní, nácagaca idú xzí'ini xi'sóë' Abraham núpasö na' náljagaca ni'a que lë na' guxzí' lu në'ë Dios.

9 Lë na' guxzí' lu në'ë Dios unödziejë' queë' Abraham rnna caní: "Ia'tú iz na'a dza huöda', ate' Sara quiu' uzóanu-bi' tubi' bi'i bönni'do'."

10 Calëgasö lë ni guca caní, pero lësca' cate' Rebeca ni' nuá'anu-bi' yugu' bi'i bönni'do' queë' Isaac, xuz xtó'otu',

11-13 cate' ni' si' iláljabi', en biti' bi núnigacabi' le naca dxi'a o le ruá' dö', Dios gudxë'-nu Rebeca na', gunné': "Bi'i bönni' zí'alö quiu' gunbi' xichinbi' bi'i buropi." Didza' ni röjlöz lë na' nazúaj lu guichi ca gunné' Dios, le rnna: "Bidxí'ida'-në' Jacob, en calëga Esaú." Caní guca, bugá'ana tsutsu le buzöë' tsaz Dios ca naca lë na' chigurö cazë'. Que lë ni na'

biti' raca caní ni'a que tu le gaca ilún bönachi, pero naca caní tu' ribõ cazë Dios nu rulidzë'.

¹⁴ ¿Bizxi caz innaru' na'a? ¿Naru' runtsë' Dios le cabí naca tsahui'? ¿Biti' ca' runë' caní!

¹⁵ Dios gudxë' Moisés, gunnë': "Huéchi' ládxa'a nu ré'ënda' huéchi' ládxa'a, en güi' ládxa'a nu ré'ënda' güi' ládxa'a."

¹⁶ Que lë ni na', biti' raca caní ni'a que le t'ëni caz bönachi, o tu' runë' bayudxi nu bönni', pero naca tu' ré'ëni quézinë' Dios, ruhuéchi' ládxe'ë bönachi.

¹⁷ Ca naca lë ni nazúaj lu guichi lá'ayi ca na' Dios gudxë' Faraón, gunnë': "Que lë ni na' buzóa' li' ga rinná bë'u para ulu'a lahui yöl-la' huáca quia' ga zu', en guna' ga ilunbë' bönachi idútë yödzölió le naca' neda'."

¹⁸ Caní naca, Dios ruhuéchi' ládxe'ë nu ré'ëni quézinë', en lësca' caní runë' zidzaj icja ládxi'da'ahuë' nu bönni' ré'ënë' gunë' zidzaj icja ládxi'da'ahuë' bönni' na', ca na' benë' queë' Faraón na'.

¹⁹ Na'a guiëli' neda': "Channö caní naca, ¿bizx que rusubáguë'ë Dios bönachi xíguia'? ¿Nuzxi caz gaca tá'baga' le ré'ëni quézinë' Dios gunë'?"

²⁰ ¿Biti' ca' naca caní! ¿Nuzxi caz li' rnnió' que Dios? ¿Naru' huácatsö tu yusu' néquini yu guië bönni' huen rö'ö, inná: "¿Bizx que benu' neda' caní?"

²¹ ¿Naru' cabí dë lu në'ë bönni' huen rö'ö gunë' que guna' na' tu yusu' nu ugún le dxin ga liná', en que la' guna' ná'asö gunë' ia'tú yusu' nu ugún le dxin ga biti' naca liná'?

²² Ré'ëni quézinë' Dios ulu'ë lahui ca gunë' xíguia' nu ruá' dö' en gunë' ga gaca bë' yöl-la' huáca queë',

pero lu yöl-la' riböza zxön ladxi' queë' biá' gulénë' yugu' bönni' ni' ral-la' ichúguië' quégaquië', yugu' bönni' na' nabága'gaquië' xíguia', en run bayudxi usunítië' légaquië'.

²³ Caní runë' Dios para gaca bë' nácatërö lesaca' yöl-la' ruzá' ladxi' queë', lë na' rulu'ë lahui lógaca nupa na' ruhuéchi' ládxe'ë, bönni' na' buzöë' quégaquië' zí'atëlö ulu'zi'ë xibé yöl-la' zxön queë'.

²⁴ Yugu' bönni' caní bulidzë' Dios. Calëgasö bulidzë' netu', bönachi judío, pero lësca' bulidzë' bönachi izá'a.

²⁵ Ca naca lë ni nazúaj lu guichi lá'ayi ca na' bë'ë didza' Oseas uláz queë' Dios, gunné':

Nupa biti' nácgaca bönachi quia',
gu'a láguequi: Bönachi quia',
ate' nupa na' biti' bidxí'ida',
gu'a láguequi: Nupa nadxí'ida'.

²⁶ La' ná'asö ga gunnía' quéguequi:

“Biti' nácali' bönachi quia’”,
si' láguequi: “Yugu' zxí'inë' Dios ban.”

²⁷ Na'a, ca naca quégaca zxí'ini xi'sóë' Israel, Isaías gunné':

Sal-la' ila'yanë' zxí'ini xi'sóë' Israel,
en iláquië' tsca naca yuzxi tu ra' yegu zxön,
ulu'lë' nabábasë'.

²⁸ Xanru' Dios la' guntë' ga gaca idútë

lë na' ichúguië' quégaca bönachi yödzölió ni.

²⁹ Lësca' caní Isaías bë'ë didza' zí'atëlö, gunné':

Dios, Xanru' unná bë' idú,
la'tu' cabí buca'anë' queëru' yugu' zxí'ini xi'sóaru',
ugá'anaru' ca yödzö Sodoma, en yödzö Gomorra,
yugu' yödzö na' busunítië' Dios.

Bönachi Israel, en didza' dxi'a

³⁰ ¿Bizxi caz innaru' na'a? Yugu' bönni' biti' nabábagaquië' Israel chibila'déli'në' nuhuöácagaquië' tsahui' lahuë' Dios, en biti' gulunë' bayudxi ulu'huöáquië' tsahui' lahuë' Dios, pero nuhuöácagaquië' tsahui' tu' ta'yéajlë'ë Dios.

³¹ Na'a, sal-la' gulunë' bayudxi yugu' bönni' Israel ilunë' ca rinná bë' xibá queë' Dios, le ral-la' gun ga ilácagaquië' tsahui', biti' bila'déli'në' le ral-la' gata' quégaquië' tu' tunë' ca rinná bë' xibá na'.

³² ¿Bizx que na' guca caní? Caní guca, tu' cabí gulunë' caní lu yöl-la' réajlë' quégaquië' Dios, pero rácasö quégaquië' gulë'ënnë' ilunë' ca rinná bë' xibá na', ate' que lë ni na' gula'chixinë', o huáca innaru': Yöjchëgu'gaquië' lu lë na' nazí'i le: Guiöj Ga Nu Røjchegu'.

³³ Ca naca lë ni nazúaj lu guichi lá'ayi, rnna: ¡Buli'yú! Uzóa'-në' yödzö Sión bönni' na' gáquië' ca tu guiöj ga nu tsöjchegu', guiöj na' gun ga nu ichixi iniguí. Nu tséajlë' Lë', biti' ca' utuí'i nu na'.

10

¹ Libí'ili', böcha'ado', le rizë ládxa'a, en le rinábida'-në' Dios gunë' quégaca bönachi Israel naca gunë' ga ulu'lë'.

² Runa' ba nalí quégaquië', idú ládxi'gaquië' tuí'i ládxi'gaquië' Dios, pero calëga len yöl-la' réajni'i idú.

³ Biti' nözguequinë' ca runë' Dios, runsë' ga nácaru' tsahui', pero té'ënnë' ilún cuíngaquië' tsahui' rácasö quégaquië', en biti' ta'cu'ë nōxaj ladxi' lahuë' Dios para gaca gunë' légaquië' tsahui'.

4 Budxi benë' Cristo le rë'ëni gun xibá queë' Moisés, benë' ga gaca ulu'huóaca tsahui' yúgu'të nupa ila'yéajlë' Lë'.

5 Ca naca que nu huóaca tsahui' tu' run ca rinná bë' xibá queë' Dios, buzúajë' Moisés lu guichi le rnna caní: "Bönni' na' gunë' idútë ca rinná bë' xibá na', soë' ibanë' tu' gunë' caní."

6 Na'a, ca naca que nu huóaca tsahui' tu' réajlë' Dios, rnna caní: "Biti' innó' lu icja ládxi'do'o, bití innó': ¿Nuzxi caz cuen ni' yehua' yubá?" Lë ni naca, para gun nu na' ga huötjë' Cristo,

7 en bití innó': "¿Nuzxi caz huötaj ga dë lataj que nupa chinátigaca?" Lë ni naca, para gun nu na' ga cuenë' Cristo, urúajë' lu yöl-la' guti.

8 Na'a, ¿bizxi caz rnna? Caní rnna: "Gala' ga zu' zoa caz xtídzë'ë Dios. Lu ru'u, en lu icja ládxi'do'o zoa xtídzë'ë na'." Lë ni naca didza' que le réajlë'ëru' Dios runtú' libán que, rnnatu':

9 "Channö didza' gu'u gaca bë' Jesús náquië' Xanu', en uyéaj lë'u idú ládxi'u Dios busubanë' Lë' lu yöl-la' guti, uló' li'."

10 Lu icja ládxi'do'oru' réajlë'ëru' Jesús para gácaru' tsahui', ate' len didza' ruí'iru', ruluí'iru' lahui le náquië' Jesucristo para uláru'.

11 Nazúaj lu guichi lá'ayi le rnna: "Bití ca' ulu'tuí' yúgu'të nupa ta'yéajlë' Lë'."

12 Dios, la' tuz ca ruí' ládxië'ë yugu' bönni' judío, enca' yugu' bönni' idútë yödzülió, tu' Lë cazë' Xanru' náquië' Xángaqüë' yúgu'të', en nápadë'ë bi unödzejë' quégaca yúgu'të nupa tu'lidza Lë'.

13 Ca naca lë ni nazúaj lu guichi lá'ayi, rnna: "Ulu'lá yúgu'të nupa ulu'lidza Lë' Xanru'."

14 ¿Nacxi gaca ulu'lidzë' Lë' channö cabí ta'yéajlë'ë Lë'? ¿Nacxi gaca ila'yéajlë'ë Lë' channö catu caz bila'yönnë' ca naca queë'? ¿Nacxi gaca ila'yönnë' channö cuntu nu zoa nu gun libán lógaquië'?

15 ¿Nacxi caz gaca ilunë' libán channö cuntu nu isöl-la' légaquië'? Ca naca lë ni nazúaj lu guichi, rnna: "Bica' bágaca nupa na' ila'dxinë' ga nacuá' bönni' röjéngaquië' libán que le ribequi dxi ládxi'ru', en tunë' libán que didza' dxi'a."

16 Na'a, calëga yúgu'të' gula'zí' lu ná'agaquië' didza' dxi'a. Ca naca lë ni, Isaías gunné': "Xan, ¿nuzxi caz guyéajlë' le bentu' libán que?"

17 Caní naca, ila'yéajlë' Lë' nupa ila'yöni, ate' lë na' ral-la' ila'yöni naca didza' ru'ë Cristo.

18 Na'a rnnía': ¿Naru' cabí bila'yönnë'? Le nácatë bila'yönnë', ca na' nazúaj lu guichi lá'ayi, le rnna: Idútë yödzölió bila'yöni chí'iguequi. Yúgu'të lataj bila'dxín xtídza'guequi.

19 Lëscá' rnnía': ¿Naru' cabí guléquibe'enë' bönni' Israel lë ni? Le nácatë guléquibe'enë' le. Ga risí lo, bë'ë didza' Moisés uláz queë' Dios, gunné':

Gun caza' ga uzxé'eli',
tu' idxí'ida' bönachi biti' nabábagaca libí'ili'.
Ni'a quégaca bönachi cabí ta'yéajni'i guna' ga leli'.

20 Gudödi ni' gúcadë'ë rugu ladxi' Isaías na', en bë'ë didza' uláz queë' Dios, gunné':

Bila'dzöli neda' nupa biti' gula'guíaj neda'.
Buluí'i lahua' lógaquië' bönni' biti' bi gula'nábinë' neda'.

21 Na'a, ca naca quégaquië' bönni' Israel, Isaías na' bë'ë didza' uláz queë' Dios, gunné': "Idú dza bulí

na'a, bulidza' bönachi biti' túngaca ca rnna xtídza'a, en ta'dá'baga' neda'."

11

Nupa nulágaca ladaj bönachi Israel

¹ Na'a rnnia': ¿Naru' nusán nē'ē Dios bönachi Israel? ¡Biti' ca' naca caní! Neda' caz naca' bönni' Israel. Naca' xzí'ini xi'sóe' Abraham, en nababa' dí'a dza queē' Benjamín, xzí'ini cazē' Israel na'.

² Dios biti' nusán nē'ē bönachi queē', nupa na' guró cazē' queē' dza ni'te. ¿Naru' cabí núnbē'ēli' lē na' nazúaj lu guichi lá'ayi ca na' benē' Elías? Bulidzē' Dios, en buzéguiē' bönachi Israel didza', gunné':

³ "Xan, chigulútiē' bönni' gulu'ē didza' uláz quiu', en bulu'quinnajē' yugu' bucugu lá'ayi quiu' ga buzéguigacatu'-ba' böa' bédxido' lo' Li'. Tuza' neda' nagá'ana' quiu', ate' té'ēnnē' ilútiē' ca' neda'."

⁴ Na'a, ¿bizxi didza' ubi'ē Dios? Caní gunné': "Nun chí'igaca caza'-nē' quia' tsónnalalaj yu' chi gáyu'ē bönni' biti' tu'zechu xzíbigaquiē' lo budó' guiōj na' nazí'i le Baal."

⁵ Lēscá' caní naca dza ni zóaru' na'a, nagá'anagaca bal-la bönachi Israel, nupa na' guró cazē' queē' Dios tu' ruzá' ládxe'ē caní quégaquiē'.

⁶ Channō naca le ruzá' ládxe'ē caní quégaquiē', biti' naca ni'a que tu le gaca ilunē'. La'tu' guca ni'a que tu le gaca gunru', lē na' ruzá' ládxe'ē queēru' Dios bítirō' gaca tu le ruzá' ládxe'ē queēru'.

⁷ ¿Bizxi caz innaru' na'a? Lē na' gula'guíljē' bönni' Israel, biti' bila'déli'nē', pero chibila'déli' le nupa ni' guró cazē' queē' Dios, ate' ia'zícá'rē' na', Dios benē' zidi icja ládxi'do'gaquiē'.

8 Ca naca lë ni nazúaj lu guichi lá'ayi, rnna: “Dios benë’ ga nácaquië’ chul-la niti.” Caní benë’, en sal-la’ gaca ila’lé’enë’ le runë’, en ila’yönnë’ xtídzë’ë, bití’ ca’ ta’yéajni’inë’. Caní naca quégaquië’ ga ridxintë dza ni zóaru’ na’a.

9 Ca naca lë ni bë’ë ca’ David didza’, gunnë’: Yugu’ laní quégaquië’ ulu’huóaca le ila’zön légaquië’,
 en ca tu yalaj ga ila’rölinë’.
 Ilaca ca’ le ilún ga ila’chíxinë’,
 en ca tu le uzí’ lëbi légaquië’.

10 Ila’chul-la guiöj lógaquië’, para cabí ila’lé’enë’.
 Ila’yechu tsaz cúdzu’gaquië’ tu’ ilu’ë yua’.

Ca gaca ulu’lágaca bönachi bití’ náca gaca judío

11 Na’a rnnía’: ¿Naru’ gula’chíxinë’ yugu’ bönni’ judío ga bidxintë gula’nítië’ tsaz? ¡Bití’ ca’ guca ca’! Gula’dá’baguë’ë xtídzë’ë Dios, ate’ na’a Dios ru’ë lataj ulu’lágaca nupa bití’ náca gaca judío para gunë’ ga ulu’zxé’enë’ yugu’ bönni’ judío léguequi.

12 Le gulunë’ bönni’ judío, gula’chíxinë’, ben ga bidxín quégaca bönachi yödzölió ni le naca ca tu yöl-la’ tsahui’. Channö caní guca, guta’ yöl-la’ tsahui’ quégaca nupa bití’ náca gaca judío tu’ gula’nítië’ yugu’ bönni’ judío, zxöntëro gaca le gata’ quéguequi cate’ yugu’ bönni’ judío na’ ulu’huóáquië’ queë’ Dios.

13 Na’a rea’ libí’ili’ bití’ nácali’ judío, rnnía’: Tu’ naca’ gubáz nasöl-lë’ë Dios lógaca nupa bití’ náca gaca judío, runa’ zxön lë na’ dë lu na’a

14 para nadxi ca’ huáca guna’ ga ulu’zxé’enë’ bönni’ uládz quia’ libí’ili’, en caní guna’ ga ulu’lë bal-lë’.

15 Channö bulu'huöáca bönachi nacuá' idú yödzülió queë' Dios tu' bulu'nítië' yugu' bönni' judío xilátjagaquië', zxöntëro gaca le gata' quéguequi cate' ulu'huöázië' xilátjagaca cazë' na'. Gaca ca raca cate' tu'bángaca nupa chinátigaca.

16 Channö rigú'uru' quez queë' Dios cúa nílado' rubéajru' zí'alö, lësca' cúa na' nagá'ana naca quez queë', en channö uzóaru' quez queë' Dios luí yaga, lësca' ilaca quez queë' ni'a në'e yaga na'.

17 Nácagaquië' bal-lë' bönni' judío ca ni'a në'e tu yaga olivo narúgugaca, ate' libí'ili', ca ni'a në'e tu yaga olivo guí'a, yöjtá'ali' yaga olivo dxi'a na', en buázili' xilátjagaca nupa na' gurúgugaca, en ruzí'ili' xibé luí, en xichöni yaga olivo dxi'a na'.

18 Que lë ni na', bití' gun ba zxön cuinli', bití' uzóali' tsölá'alö nupa nácagaca ca ni'a në'e na' narúgugaca. Channö run ba zxön cuinli', ral-la' inözili' calëga libí'ili' rugáguli' luí yaga na', pero luí yaga na' rugagu libí'ili'.

19 Nadxi ca' innó: "Gula'rugú ni'a në'e yaga na' para gaca tsázia' neda' xilátjagaca."

20 Nácaté didza' ru'u, pero gula'rúguië' tu' cabí gula'yéajlë'ë, ate' yöjtó'o lí' yaga na' tu' réajlë'u Dios. Que lë ni na', bití' ral-la' gun ba zxön cuinu', pero ral-la' gádxinu' Dios.

21 Channö benë' Dios léguequi xíguia', nupa na' nácagaca caz ni'a në'e yaga dxi'a na', ¿naru' cabí gunë' xíguia' ca' lí'?

22 Buyútsöca' na'a ca náquië' dxi'i ladxi' Dios, en ca rúndë'ë ca' xíguia'. Le nácaté rúndë'ë xíguia' nupa na' gula'chixi, pero náquië' dxi'i ladxi' len lí'. Que lë ni na', ral-la' gúntica'su' ca sa'yéaj yöl-la' dxi'i

ladxi' queë' na', para cabí ichúguië' ca' li' lu yaga queë' na'.

²³ Lësca' caní gaca quégaquië' channö cabí ulu'gá'anë' lu yöl-la' cabí réajlë' quégaquië', tsöjtá'gaquië' leyúbölö lu yaga na', tu' napë' Dios yöl-la' huáca gunë' ga tsöjtá'gaquië' le leyúbölö.

²⁴ Nacu' li' ca tu ni'a në'e gurugu lu yaga olivo guí'a, en yöjtó'o yaga olivo dxi'a ga cuntu nu udá' tu ni'a në'e yaga guí'a. Yenni'tërö huáca quégaquië', náca gaca cazë' ni'a në'e yaga dxi'a na', huáca tsöjtá'gaquië' leyúbölö lu yaga quéguequi cazë' na'.

Ca gaca ulu'lægaca bönachi Israel

²⁵ Böcha'ado', ré'ënda' inözili' lë ni bigachi', para cabí gun ba zxön cuinli' ca naca yöl-la' réajni'i queëli'. Bulu'huóaca bal-la bönachi Israel zidi ladxi', ate' caní iláquië' ga idxinrö dza chinayá zgaca yúgu'të bönachi biti' náca gaca judío ga rinná bë'ë Dios, nupa na' ral-la' ulu'lægaca.

²⁶ Tödi na' gata' lataj ulu'lë' ca' yúgu'të bönni' Israel, ca na' nazúaj lu guichi lá'ayi, rnna:

Iruáj yödzö Sión Nu rusölá,

en ugúa le ruá' dö' nabága' gaca zxí'ini xi'sóë' Jacob.

²⁷ Lë ni naca didza' dzaga gúnlena' légaquië'

cate' ugúa' dul-la' nabága'gaquië'.

²⁸ Caní naca, gula'dá'baguë'ë didza' dxi'a, ate' Dios guléaj ládxe'ë légaquië' para gaca uláli' libí'ili', pero nadxí'inë' ca' légaquië', tu' gurö cazë' queë' xuz xtó'ogaquië'.

²⁹ Tsaz runödzejë' Dios le runödzejë', en tsaz rulidzë' bönachi.

³⁰ Ca na' naca queëli', zí'atëlö biti' benli' ca rna xtídzë'ë Dios, ate' na'a ruhuéchi' ládxë'ë Dios libí'ili' tu' cabí gulunë' yugu' bönni' judío ca rnnë'.

³¹ Lësca' caní naca quégaquië' na'a, biti' tunë' ca rnnë' Dios, pero caní gácasö ga idxinrö dza huéchi' ládxë'ë Dios légaquië', ca ruhuéchi' ládxë'ë libí'ili' na'a.

³² Dios guléaj ládxë'ë yúgu'të bönachi para ila'dá'baguë'ë xtídzë'ë, para gaca huéchi' ládxë'ë yúgu'të'.

³³ Zxöntërö naca yöl-la' tsahui' queë' Dios, lë na' naca yöl-la' huáca zxön, en yöl-la' réajni'i queë'. Cuntu nu gaca tséajni'i le nuzóë' Dios gunë', en biti' gaca nu inözi yugu' le runë' Dios.

³⁴ ¿Nuzxi caz guyéajni'i le guzá' ládxë'ë Xanru'? ¿Nuzxi caz buzéajni'i Lë'?

³⁵ ¿Nuzxi caz bi bunödzej queë' Dios para gun bayudxi bi ubi'ë Dios que?

³⁶ Yúgu'të le dë narúajgaca lu në'ë Dios, en taca lu në'ë, en nácgaca para uzi'ë xibéguequi. ¡Gácatíca'sö queë' Dios yöl-la' ba! ¡Ca' gaca!

12

Ral-la' udödi cuinru' quez queë' Dios

¹ ¡Böchi' luzá'ado'! ¡Ruhuéchi' ládxë'ë Dios rë'u! Que lë ni na' ráta'yua' loli' udödi cuinli' lu në'ë Dios, gácali' ca tu le naca ban rigú'uru' lahuë' Dios, para gácali' quez queë', le gaca tu le tsaza ládxë'ë Dios. Lë ni ral-la' gunli', ca sa'yéaj le reaj ládxi'ru'-në' Dios.

² Bítirö gunli' la' lëbisö ca tun bönachi dza ni zóaru' na'a, pero guli'gaca bönachi cubi tu' nucubë' Dios icja ládxi'do'oli'. Guli'gún caní para gaca

inözili' le naca dxi'a rě'eně' Dios gunli', lě na' raza lădxě'ě, en le naca idú.

³ Na'a, tu' zoa le buzá' lădxě'ě quia' Dios, rea' yúgu'těli': Biti' gun ba zxôn cuinli', le cabí ral-la' gunli', pero ral-la' gácali' nōxaj ladxi' ca ribequi ícjali', tsca naca yöl-la' réajlě' queěli' Dios le benně' que queěli'.

⁴ Ca na' naca tuz idútě le naca cázaru', sal-la' zían le nagudi' dzágalenru', en calěga tuz dxin tun yúgu'tě le zían na' nagudi' dzágalenru',

⁵ lěsca' caní naca queěru'. Sal-la' zianru' zóaru', nácaru' ca tuz le naca cázaru' tu' nácaru' tuz len Cristo, ate' que lě ni na' yúgu'těru' nácaru' tuz turu' len ia'turu'.

⁶ Tu turu' dě lu ná'aru' tu le benně' queěru' Dios, ate' nadzá'gaca tu tu tsca naca le buzá' lădxě'ě que queěru'.

Bönni' na' Dios bunödzjě' queě' gu'ě didza' uláz queě',

tsca réajlě'ě Lě, ral-la' gu'ě didza' bönni' na'.

⁷ Bönni' na' Dios bunödzjě' queě' guně' xichině', dxí'ado' ral-la' guně' dxin na'.

Bönni' na' Dios bunödzjě' queě' usédině' bönachi, dxí'ado' ral-la' usédině' bönachi.

⁸ Bönni' na' Dios bunödzjě' queě' uzéajni'ině' bönachi,

dxí'ado' ral-la' uzéajni'ině' légaquiě'.

Bönni' bi unödzjě' que nu yúbölö, idú lădxě'ě ral-la' unödzjě'.

Bönni' rinná bé'eně' bönachi, idú lădxě'ě ral-la' guně' caní.

Bönni' rácaleně' luzě'ě, len yöl-la' rudzeja ral-la' guně' caní.

Yugu' le ral-la' gun nu nequi queë' Cristo

⁹ Ral-la' idxí'ili' luzá'ali' idú ládxi'li'.

Buli'cá'ana le ruá' dö'.

Guli'güí' ládxi'li' gunli' le naca dxi'a.

¹⁰ Guli'dxi'i-guéquinë' luzá'ali'

ca nadxí'iguecli'-në' böchi' cázali'.

Ca runli'-në' bal luzá'ali'

ral-la' gunli' ga gácarë' lo ca nácali' la' cuínsili'.

¹¹ Buli'típatica'sö ládxi'li', en biti' gácali' xöhuëdi.

Guli'gún xichinë' Xanru' idú ládxi'li'.

¹² Buli'dzeja tu' zoa le runli' löza.

Guli'cöz zxön ladxi' cate' bi riguí'i rizáca'li'.

Buli'lídzatica'së' Dios.

¹³ Buli'nödzej quégaca bönachi queë' Cristo

tasca nayádzjaguequinë'.

Guli'güí' lataj ga ila'cuá' nupa ta'dxín queëli'.

¹⁴ Guli'nábinë' Dios gunë' dxi'a

quégaca nupa ta'bía ládxi'gaca libí'ili'.

Guli'naba gaca dxi'a quégaquië',

en biti' udxíali' légaquië' dö'.

¹⁵ Buli'dzėjalen nupa tu'dzeja.

Guli'cödxilen nupa ta'bödxi.

¹⁶ Guli'gaca tuz len luzá'ali'.

Biti' gun ba zxön cuinli',

pero guli'gún tsözxön yugu' bönni' nöxaj ladxi'.

Biti' guéquilí' chinadéli'li' idútë yöl-la' réajni'i.

¹⁷ Cuntu nu ubí'ili' que,

biti' guá'ali' dö' que nu ruá' dö' queëli'.

Guli'gún dxi'a quégaca yúgu'të bönachi.

¹⁸ Channö huáca, tsca séqui'li', guli'cöz dxi'a

len yúgu'të bönachi.

19 Böchi' luzá'ado', biti' uzí' lëbili' bönachi la' libí'sili', pero guli'gü' lataj ubi'ë Dios quégaca bönachi na', tu' nazúaj lu guichi lá'ayi le rnna:

Neda' caza' uzí' lëba'.

Neda' ubi'a quégaca bönachi.

Caní gunnë' Xanru' Dios.

20 Lësca' caní rnna:

Channö zoë' nu bönni' biti' ridzáguië' li' dxi'a, en ridunë', bë'ë le gahuë'.

Channö ribidxë' nisa, bë'ë le guí'jë'.

Cate' gunu' caní, gunu' ga utuí'inë' bönni' na'.

21 Biti' gu'u lataj inná be'e le ruá' dö' li',

pero gunná be'e le ruá' dö' na',

ugunu' dxin le naca dxi'a.

13

1 Yúgu'tëli' ral-la' gunlí' ca ta'nnë' bönni' yúlahui'. Dios caz budödë' lu ná'agaquië' yöl-la' unná bë' ná'agaquië', en nucu'ë xilätjagaquië' bönni' ni dë lu ná'agaquië' yöl-la' unná bë'.

2 Que lë ni na', nu ridá'baga' yúlahui' ridá'baga' le nuzóa cazë' Dios, ate' nupa ta'dá'baga' caní, nabága'gaca xiguia'.

3 Nacu'ë bönni' yúlahui', calëga para ulu'zenë' bach nu run le naca dxi'a, pero para ulu'zenë' bach nu ruá' dö'. Channö rë'ënu' gunu' ga biti' ulu'zenë' li' bach, ben le naca dxi'a, ate' uruju' dxi'a lógaquië'.

4 Náquië' bönni' yúlahui' ni'a në'ë Dios para gácalenë' li', pero channö runu' le ruá' dö', ral-la' gádxinu', tu' cabí nu'ë nítisö xiyaga yúlahui'. Náquië' ni'a në'ë Dios para uzí' lëbë', gunë' xíguia' nu ruá' dö'.

5 Que lë ni na' run bayudxi gunli' ca rnnë bönni' na' dë lu në'ë, calëgasö tu' budödë' Dios lu në'ë gunë' libí'ili' xíguia', pero lësca' para soa dxi ládxi'do'oli' lahuë' Dios.

6 Que lë ni na' ca' riguizxaj lázali' que yúlahui', tu' nácagaquië' bönni' yúlahui' ni'a në'ë Dios, en tunë' le nudödi cazë' lu ná'agaquië'.

7 Guli'guíxaj yúgu'të bönachi le rál-la'li' quégaquië'. Guli'guíxaj lázali' lu na' nu ral-la' quíxaj lázali'. Guli'guíxaj dumí nu ral-la' quízxjali'. Guli'gadxi nu ral-la' gádxili', en guli'gún bal nu ral-la' gunli' bal.

8 Cuntu nu bi ral-la' gál-la'li' que, pero tuz ral-la' idxí'ili' luzá'ali', tu' chibén idú ca rinná bë' xibá queë' Dios nu nadxí'i luzé'e.

9 Caní ta'nná bë' xibá na':

Biti' gunu' dul-la' le riguitsaj xibá que yöl-la' nut-saga na'.

Biti' gútiu' bönachi.

Biti' cuanu'.

Biti' innió' que luzó'o le cabí nácatë.

Biti' së ládxi'u le dë que luzó'o.

Yugu' xibá ni, en yúgu'të xibá ia'zíca'rö, údxi gun nu run ca rnna didza' rnna caní:

Bidxí'i luzó'o ca nadxí'i cuinu'.

10 Nu na' nadxí'i luzé'e bití' bi run que luzé'e le ruá' dö'. Caní naca, nu na' nadxí'i luzé'e run idú ca rinná bë' xibá queë' Dios.

11 Guli'gún caní tu' nözili' ca raca dza ni zóaru' na'a, en nözili' ca' chibidxín dza usubán ládxi'li' ca rubán nu chiguxi, tu' chizóarö gal-la' dza uláru' lu le ruá' dö' ca guca cate' ni' gusí loru' réajlë'ëru' Cristo.

¹² Ga zóaru' na'a naca ca chi'i dzö'ölö, ate' chizóa tödi rëla na', pero ga na' zoë' Cristo naca ca lahui' dza, ate' chizóa tsöjsóaru' ni'. Que lë ni na' ral-la' ucá'anaru' le tun bönachi ga naca chul-la que dul-la'. Ca na' rugacu cuinë' tu bönni' rejë' gudil-la le run chi'i lë' lu gudil-la, ral-la' taru' lu bení' queë' Dios, le gun chi'i rë'u lu na' tu' xihui'.

¹³ Para gunru' caní ral-la' gunru' dxi'a ca ral-la' gun nu ridá lahui' dza.

Biti' ral-la' súdxiru', en cabí gágulë'ëru'.

Biti' ral-la' gunru' le ruá' dö', en calëga le gun ditaj rë'u.

Biti' ral-la' tíl-lalenru' luzá'aru', en cabí uzxé'eru' luzá'aru'.

¹⁴ Na'a, ral-la' un cuinli' lu icja ládxi'do'oli' ca náquië' Xanru' Jesucristo, en biti' gü'i ládxi'li' gunli' le rizë ládxi'li' lu yöl-la' bönáchisö queëli'.

14

Biti' ral-la' si' quídza'ru' böchi' luzá'aru'

¹ Guligüi' lataj nu réajlë' Cristo gun libí'ili' tsözxön sal-la' biti' naca idú ca réajlë' nu na' Lë'. Biti' tíl-lalenli' nu na' ca nácacaga le runi nu na' huáca nu gun.

² Ca naca lë ni, nacuë bönni' runi légaquië' huáca ilahuë' yúgu'të le tagu bönachi, pero ia'bal-lë bönni', tu' cabí naca idú ca ta'yéajlë'ë Cristo, tágusë' le raza ruzóaru'.

³ Na'a, bönni' na' rahuë' yúgu'të biti' ral-la' uzöë' tsólá'alö nu bönni' biti' rahuë' yúgu'të, en lësca caní, bönni' na' biti' rahuë' yúgu'të biti' ral-la' si' quídze'ë bönni' na' rahuë' yúgu'të, tu' nazí' lu në'ë Dios iropë' bönni' na' ta'yéajlë'ë Cristo.

⁴ ¿Nuzxi caz li', rizí' quídzu'u bönni' huen dxin que nu yúbölö? Bönni' na' náquië' huen dxin queë' Dios, lahuë' Xan cazë' urúajë' tsahui' o biti' urúajë' tsahui'. Channö urúajë' tsahui' lahuë' Dios, naca tu' gun cazë' Xanru' Dios ga urúajë' tsahui'.

⁵ Nadxi ca' zoë' nu bönni' runrë' bal tu dza ca runë' bal ia'zica'rö dza, ate' bönni' yúbölö, tuz ca runë' bal yúgu'të dza. Tu turu' ral-la' usédada'aru' channö naca dxi'a le runru'.

⁶ Bönni' na' runë' bal tu dza, runë' le bal para tseaj ládxe'ë Xanru', ate' bönni' na' biti' runë' bal dza na', para tseaj ládxe'ë Xanru' biti' runë' bal dza na'. Lësca' caní, bönni' na' rahuë' yúgu'të, rahuë' caní para tseaj ládxe'ë Xanru', en rë'ë Dios: "Xclenu'", ate' bönni' na' biti' rahuë' yúgu'të, biti' rahuë' le para tseaj ládxe'ë Xanru', en rë'ë ca' Dios: "Xclenu'."

⁷ Biti' zoë' nabanë' queëzë' nitüë' bönni' nabábalenë' rë'u, en biti' ratië' queëzë' nitüë' bönni'.

⁸ Channö zóaru' nabanru', para tseaj ládxi'ru'në' Xanru' zóaru' nabanru', en channö gátiru', para gaca yöl-la' ba queë' Xanru' gátiru'. Caní naca, channö zóaru' nabanru' o channö gátiru', nequi quéziru' queë' Xanru'.

⁹ Que lë ni na' ca' gútië' Cristo, en bubanë', para gáquië' Xángaca nupa chinátigaca, en nupa nabángaca.

¹⁰ Na'a li', ¿bizx que richugu bë'u böchi' luzó'o? ¿Bizx que ruzú' tsölá'alö böchi' luzó'o? Yúgu'tëru' idxinru' lahuë' Cristo ga uchi'a usöröë' rë'u.

¹¹ Ca naca lë ni nazúaj lu guichi lá'ayi, rnna: Rnnë' Xanru': "Ni'a quia' neda' caz,

ulu'zechu zxi'bigaca yúgu'të bönachi lahua' neda'.
Ila'guixjö' yálajdo' naca' Dios."

¹² Caní naca, uchi'a usöröë' Dios yúgu'tëru'.

Biti' ral-la' gunru' ga ichixi iníquinë' böchi' luzá'aru'

¹³ Que læ ni na', bítirö ral-la' ichugu bé'eru' luzá'aru', pero ral-la' gun yúdxiru' cabí gunru' ga ichixi iníquinë' böchi' luzá'aru', en para cabí gunru' ga gunë' dul-la'.

¹⁴ Nöz quézida' bití' bi dë le ráguru' le gaca gun ga bítirö nácaru' tsahui' lahuë' Dios, ate' röjloz læ ni didza' bë'e Xanru' Jesús. Channö réquinë' tu bönni' zoa bi gaca gun ga bítirö náquië' tsahui' lahuë' Dios, queë' bönni' ni, caní naca.

¹⁵ Channö rusuhu'innu' böchi' luzó'o, tu' ragu' le runi læ' bití' ral-la' gáguru', bití' runu' ca ral-la' gun nu nadxí'i böchi' luzé'e. Bití' bi ral-la' gagu' le gun ga gaca chopá ládxë'ë bönni' na', gútië' Cristo uláz queë'.

¹⁶ Que læ ni na', bití' bi gunli' le gun ga ila'nnë xihui' bönachi que le rusáca'li' queëli' naca tsahui'.

¹⁷ Cate' rinná bé'enë' Dios rë'u, bití' ru'í' ládxi'ru' le gu'áj gáguru', pero ru'í' ládxi'ru' gácaru' tsahui', en sóaru' dxi ládxi', en udzéjaru', yugu' le gaca gunru' tu' zóalenë' Dios Bö' Lá'ayi rë'u.

¹⁸ Núti'tës nu run xichinë' Cristo ca nácgaca læ ni, run le raza ládxë'ë Dios, ate' urúaj dxi'a lógaca bönachi.

¹⁹ Que læ ni na' ral-la' gunru' le ilún ga gata' le ribequi dxi ládxi'ru' len yúgu'të bönachi, en le ilún tsutsu turu' ia'turu' ca réajlë'ëru' Cristo.

²⁰ Biti' bi ral-la' gagu' le gun ga gaca chopa ladxi' nu na' nuzóë' Dios. Nácatë læ na' ta'nná bönachi: "Yúgu'të dë lataj gáguru'", pero gunru' le ruá' dö' channö gunru' ga ichixi iníguinë' luzá'aru' tu' nözi læ na' ráguru'.

²¹ Gácarö dxi'a cabí gagu' bëla', en cabí guí'ju' xisi uva nal-la, en biti' bi gunu' le gun ga ichixi iníguinë' böchi' luzó'o, o le gun ga gaca chopa ládxë'ë, o le gun ga huőaj ládxë'ë ca réajlë'ë Cristo.

²² Channö réajlë'u dë lataj bi gunu', ral-la' gunu' le lahuë' Dios ga zu' tuzu'. Bica' ba bönni' na' biti' ruxösa ládxi'da'ahuë' læ' tu' nözi læ na' runi læ' dë lataj gunë',

²³ pero bönni' na' raca chopa ládxë'ë tu' nözi le rahuë', nabáguë'ë xíguia', tu' runë' le cabí runi læ' dë lataj gunë'. Naca dul-la' yúgu'të le runru', le cabí runi ré'u dë lataj gunru'.

15

Ral-la' gunru' le raza ládxë'ë böchi' luzá'aru'

¹ Que læ ni na', channö nácaru' tsutsu ca réajlë'ëru' Cristo, ral-la' guá' ilenru' nupa na' nagul-la ládxi'gaca ca ta'yéajlë' Cristo. Biti' ral-la' gunru' le raza ládxi'ru' la' cuínsiru'.

² Yúgu'tëru' ral-la' gunru' le raza ládxë'ë böchi' luzá'aru' para gaca dxi'a queë', en idipa ládxë'ë ca réajlë'ë Cristo.

³ Caní ral-la' gunru', tu' cabí benë' Cristo le guyaza ládxë'ë la' cuinsë', pero guca queë' ca na' nazúaj lu guichi lá'ayi, le rnna: "Budubága'gaca neda' yugu' didza' xihui' guluí'i nupa gula'nnë xihui' quiu' Li', Dios."

4 Yúgu'të le bulu'zúajë' lu guichi lá'ayi dza ni'te, bulu'zúajë' lu guichi para usëdi rë'u. Lë na' nazúaj lu guichi lá'ayi run ga ribözaru' zxön ladxi', en ruhuë tsahui' rë'u. Que lë ni na' zoa le runru' löza.

5 Rinábida'-në' Dios, Nu run ga ribözaru' zxön ladxi', en Nu ruhuë tsahui' rë'u, gunë' ga gunli' tuz ca rusáca'li' queëli', para gácali' ca na' ré'ënë' Jesucristo.

6 Caní ral-la' gunli' para gácali' tuz, cú'uli'-në' tsözxön yöl-la' ba Dios, Xuzë' Xanru' Jesucristo.

7 Que lë ni na', para gaca yöl-la' ba queë' Dios, guli'sí' lu ná'ali' tuli' ia'tuli' ca na' Cristo guzxi' lu në'ë ca' rë'u.

8 Caní ral-la' gunli', tu' rea' libí'ili': Bidë' Jesucristo, en gúcalenë' bönachi judío, ate' caní bulu'e lahui naca idütë li didza' ru'ë Dios, ate' benë' ga bulu'dxín le guzxi' lu në'ë Dios unödzejë' quégaquië' xuz xtó'otu'.

Yugu' bönachi izá'a ila'yöni didza' dxi'a

9 Bidë' ca' Cristo para benë' ga ila'gú'u Dios yöl-la' ba nupa biti' nácgaca judío tu' ruhuéchi' ládxë'ë Dios légaquië'. Ca naca lë ni nazúaj lu guichi lá'ayi le rnna:

Que lë ni na', ulu'a lahui le nacu' Li'
lógaca bönachi idütë yödzölió,
en gul-la' quiu' yöl-la' ba.

10 Ga yúbölö nazúaj lu guichi lá'ayi le rnna:
Libí'ili', bönachi idütë yödzölió,
buli'dzéjalen bönachi queë' Dios.

11 Ga yúbölö nazúaj ca' lu guichi lá'ayi le rnna:
Guli'cu'ë Xanru' yöl-la' ba,
yúgu'tëli' biti' nácali' judío.
Guli'tséaj ladxi' Lë',

yúgu'tèli' zóali' idútë yödzülió.

¹² Lësca' caní buzúajë' Isaías lu guichi le rnna:
 Ilá' lahui Nu nababa di'a dza queë' Isaí.
 Gaca lo Nu na' para inná be'e nupa biti' náçagaca
 judío.

Nupa ni ilún löza Lë'.

¹³ Rinábida'-në' Dios, Nu run ga runru' löza, gunë'
 ga udzëjade'eli', en ga soa dxi ládxi'li' tu' réajlë'ëli'
 Lë', en gunë' ga gaca idú ca runli' löza, tu' zóalen
 yöl-la' huáca queë' Dios Bö' Lá'ayi libí'ili'.

¹⁴ Böchi' luzá'ado'. Chinöz quézida' rúntica'sili' le
 naca dxi'a, en dëda' yöl-la' réajni'i queëli' para gaca
 uzéajni'ili' luzá'ali'.

¹⁵ Na'a naca' rugu ladxi', ruzúaja' queëli' lu
 guichi ni, böcha'a, en rusá'a ládxi'li' tu' zoa le buzá'
 ládxi'ë Dios quia' neda'.

¹⁶ Que lë ni na' runa' xichinë' Jesucristo lógaca
 bönachi biti' náçagaca judío, en runa' libán que
 didza' dxi'a queë' Dios, para gaca ugu'a bönachi
 biti' náçagaca judío lu në'ë Dios, nupa na' gurö
 cazë' Dios Bö' Lá'ayi queë' Lë'. Ilácagaquië' ca tu le
 rigú'uru' lu në'ë Dios, le raza ládxi'ë Lë'.

¹⁷ Na'a, tu' rúnlena' tsözxön Jesucristo dxin, dë lu
 na'a tsaza ládxa'a ca naca le nuna' lu xichinë' Dios.

¹⁸ Lësca' rurúguida' innía' ca naca lë na' benë'
 Cristo lu na'a neda', benë' ga tun bönachi biti'
 náçagaca judío ca rnna xtídzë'ë Dios. Lë ni benë'
 Lë', bugunë' dxin didza' bë'a neda', en yugu' dxin
 bena' neda'.

¹⁹ Lu na'a neda' bugunë' dxin ca' le náçagaca
 bë' bulu'e lahui Lë', en yugu' yöl-la' huáca zxön
 benë', en yöl-la' huáca na' queë' Dios Bö' Lá'ayi le
 guzóalen neda'. Caní guca, gusí lahua' runa' libán

lu yödzo Jerusalén, ate' idú gásibi'ilö ga ridxintë luyú Ilírico, chinuna' libán que didza' dxi'a ca naca queë' Cristo.

²⁰ Bë' ládxa'a bena' libán que didza' dxi'a ga biti' bila'yöni bönachi ca naca queë' Cristo. La'tu' guna' libán ga chibila'yöni bönachi, guna' neda' ca runë' tu bönni' ruguelë'ë lahui dxin zxön chinunë' bönni' yúbölö.

²¹ Ca bena' neda' naca ca na' nazúaj lu guichi lá'ayi le rnna:
Ila'lé'e nupa nacuá' ga cuntu nu ben libán queë'
Lë',
en ila'yéajni'i nupa catu caz bila'yöni ca naca queë'.

Rë'ënë' Pablo tsejë' yödzo Roma

²² Que lë ni na', sal-la' zían luzuí gú'unida' guída' ga zóali', biti' guca guída'.

²³ Na'a, chibudxi bena' dxin quia' yugu' lataj ni, en chiré'ënda' zían iz guída' ga zóali'.

²⁴ Que lë ni na', cate' tseja' luyú España, töda' ga zóali' libí'ili', tu' runa' löza uduyúa' libí'ili', en udzéalenda' libí'ili'. Tödi ni' huáca ugú'uli' neda' nöza.

²⁵ Na'a ral-la' tseja' Jerusalén, tsöju'a tu le gácalen nupa ni' néquiquequi queë' Cristo.

²⁶ Caní guna', le gula'yaza ládxi'gaquië' bönni' nacu'ë luyú Macedonia, en luyú Acaya, bulu'tubë' bi tu'nödzejë' quéguequi bönachi yechi' dzágagaca bönachi queë' Cristo, nacu'ë Jerusalén.

²⁷ Gula'yaza ládxi'gaquië' bönni' biti' nácagaquië' judío gulunë' lë ni. Le nácatë naca tu le rál-la'gaquië' quégaca bönachi judío ni'. Channö bönni' biti' nácagaquië' judío tu'zi'ë xibé le nácagaca queë'

Dios ni'a que le núngaca bönachi judío, lësca' ral-la' ilácalenë' bönachi judío na', ulu'gunë' dxin le dë quégaquië'.

²⁸ Que lë ni na', cate' údxi udöda' lu ná'agaca bönachi judío lë na' bulu'nödzjë' bönni' ni, ní'irö töda' ga zóali' libí'ili' cate' tseja' luyú España.

²⁹ Cate' guída' ga zóali', runa' löza idxínlena' yúgu'të le ruzí'iru' xibé ni'a que didza' dxi'a queë' Cristo.

³⁰ Ni'a queë' Xanru' Jesucristo, en ni'a que yöl-la' nadxí'i ruchízië' Dios Bö' Lá'ayi icja ládxi'do'oru', ráta'yua' loli', böcha'ado', ulídzali'-në' Dios tsözxön len neda', inábili'-në' gácalenë' neda'.

³¹ Guli'nabi-në' Dios gunë' ga ulá' neda' lu ná'agaquië' bönni' bití' ta'yéajlë'ë nacu'ë luyú Judea, en gunë' ga ila'yaza ládxi'gaquië' ila'zi'ë lë na' tsöju'a lu ná'agaquië' bönni' nácagaquië' queë' Cristo, nacu'ë Jerusalén.

³² Guli'nabi-në' ca', channö naca ca rë'ënë' Dios, gunnë' neda' lataj idxina' queéli' len yöl-la' rudzeja quia', para uzí' ládxi'lëna' libí'ili'.

³³ Na'a rinábida'-në' Dios, Nu run ga zoa dxi ládxi'ru', sóalenë' yúgu'tëli'. ¡Ca' gaca!

16

Tu'gapa Dios luzë'eguequi bönachi queë' Cristo

¹ Rigu'a-nu lu ná'ali' Febe, nigula zanru' dá'anu Xanru'. Nácanu nigula huen dxin queë' Dios dzáganu bönachi queë' Cristo nacuá' yödzö Cencia.

² Uláz queë' Xanru' guli'sí' lu ná'ali'-nu nigula na', ca ral-la' ilún bönachi queë' Cristo. Guli'gácalen lënu, unödzjali' queënu bíti'tës bi riquínnu. Lë

cázanu gúcalennu bönachi zián, en gúcalennu ca' neda'.

³ Guli'gapa Dios Priscila, en Aquilo, nupa na' gulunlen neda' tsözxön dxin queë' Jesucristo.

⁴ Chopë' ni gula'dödë' ga guzóa bönadxi ilátië' para gulunë' ga cabí gátia' neda', ate' rea' légaquië': "Xclenli'", en calégasö neda', pero lësca' yúgu'të böchi' luzá'aru' nabábagaquië' gapa nacuá' bönachi queë' Cristo biti' nácagaca judío, tē'ë légaquië': "Xclenli'."

⁵ Guli'gapa Dios bönachi queë' Cristo tu'dubë' lu yu'u lídxigaquië' Priscila, en Aquilo na'. Guli'gapa Dios Epeneto, bönni' na' nadxí'ida'. Bönni' ni guyéajlë'ë Cristo zí'atëlö ca yúgu'të bönachi luyú Acaya.

⁶ Guli'gapa Dios María, nigula na' bennu dxin zxön queë' Cristo ga ni' rudúbili' libí'ili'.

⁷ Guli'gapa Dios Andrónico, en Junias, yugu' bönni' uládz quia'. Yugu' bönni' ni gula'dzúnlenë' neda' tsözxön lidxi guié, en nadéli'gaquië' lataj lo ladaj bönni' gubáz nasöl-lë'ë Cristo. Lësca' gula'yéajlë'ë Cristo zí'alö ca neda'.

⁸ Guli'gapa Dios Amplias, bönni' na' nadxí'ida', en néquinë' queë' Xanru'.

⁹ Guli'gapa Dios Urbano, bönni' na' bénlenë' netu' tsözxön dxin queë' Jesucristo. Guli'gapa Dios Estaquis, bönni' na' nadxí'ida'.

¹⁰ Guli'gapa Dios Apeles, bönni' na' naca bë réajlë'ë Cristo. Guli'gapa Dios nupa nacuá' lidxë' Aristóbulo.

¹¹ Guli'gapa Dios Herodión, bönni' uládz quia'. Guli'gapa Dios nupa nacuá' lidxë' Narciso, en ta'yéajlë'ë Xanru'.

12 Guli'gapa Dios Trifena, en Trifosa, nigula na' tunnu dxin queë' Xanru'. Guli'gapa Dios Pérsida, nigula na' bennu dxin zxön queë' Xanru', ate' nadxí'iru'-nu.

13 Guli'gapa Dios Rufo, bönni' rö queë' Xanru'. Guli'gapa Dios xiné'ë Rufo na', nácanu ca' ca xiná' caza'.

14 Guli'gapa Dios Asíncrito, en Flegonte, en Hermas, en Patrobas, en Hermes, enca' yugu' böchi' luzá'aru' dá'gaquië' Xanru', nacué'lenë' légaquië'.

15 Guli'gapa Dios Filólogo, en Julia, en Nereo, en nigula zané' Nereo na', enca' Olimpas, en yúgu'të böchi' luzá'aru' ta'yéajlë'ë Cristo, nacué'lenë' légaquië'.

16 Guli'gapa Dios luzá'ali', unída'li' luzá'ali' lu yöl-la' nadxí'i queëli'. Tu'gapë' Dios libí'ili' yúgu'të böchi' luzá'aru' nabábagaquië' gapa nacué' bönachi queë' Cristo luyú ni.

17 Na'a, ráta'yua' loli', böcha'ado', guli'gún ga ilaca bë' nupa tun ga irúajli' choplö, en tun ga ichixi iníguili', tu' tu'sédinë' le cabí röjlöz le nazédali'. Guli'cuíta ga nacué' bönachi caní

18 tu' cabí tun xichinë' Jesucristo. Tunë' dxin para bi gata' quégacasë', en ta'zí' yé'enë' yugu' bönni' nöxajladxi', tu'gunë' dxin didza' nöxajladxi', en didza' tséajlë'ëru' le cabí nácatë.

19 Rizë didza' ca na' runli' ca rna xtídzë'ë Xanru', ate' ta'yöni yúgu'të bönachi. Que lë ni na' rudzëjada' ni'a que le runli' libí'ili'. Na'a, ré'ënda' gácali' sina' gunli' le naca dxi'a, en calëga gunli' le ruá' dö'.

20 Dios, Nu run ga zóaru' dxi ladxi', si' gunë' ga ucúl-lali' Satanás, tu' xihui'. Rinábida'-në' Xanru'

Jesucristo uzá' láchxë'ë queëli' le gácalen libí'ili'.

²¹ Bi'i Timoteo, bi'i na' rúnlenbi' neda' tsözxön dxin, rugápabi' Dios libí'ili'. Lucio, en Jasón, en Sosípater, yugu' bönni' uládz quia', tu'gapë' Dios libí'ili'.

²² Neda', Tercio, ruzúaja' lu guichi didza' ni ru'ë Pablo, rugapa' Dios libí'ili', dzáguië' Xanru' neda'.

²³ Gayo, bönni' ni ru'ë neda' lataj zoa' lidxë', en ru'ë ca' lataj tu'dubi yúgu'të bönachi queë' Cristo ni, rugapë' Dios libí'ili'. Erasto, bönni' yu'u lu në'ë dumí que yödzo ni, rugapë' Dios libí'ili'. Böchi'ru'do' Cuarto rugapë' Dios libí'ili'.

²⁴ Rinábida'-në' Xanru' Jesucristo uzá' láchxë'ë queëli' yúgu'tëli' le gácalen libí'ili'. ¡Ca' gaca!

Yöl-la' ba Dios

²⁵ Na'a, rigú'utu'-në' yöl-la' ba Dios, Nu gaca gun tsutsu libí'ili' ca naca didza' dxi'a runa' libán que, en ca naca libán runa' ca naca queë' Jesucristo, en ca naca le chibulu'ë lahui Dios que le bigachi' queë', lë na' bucáchë'ë Lë' dza ni'te ga bidxintë na'a dza.

²⁶ Na'a chibulu'ë lahui lë ni yugu' lu guichi bulu'zúajë' bönni' gulu'ë didza' uláz queë' Dios ca na' gunná cazë' Dios, Nu zóatica'sö. Na'a raca libán que lógaca yúgu'të bönachi para gaca ila'yéajlë' Cristo, en ilún ca rna xtídzë'ë.

²⁷ ¡Ni'a que le benë' Jesucristo, gácativa'sö yöl-la' ba queë' la's dui Dios, Nu rácatëro caz! ¡Ca' gaca!

Didza' cubi rucá'ana tsahui'
**New Testament in Zapotec, Rincón (MX:zar:Zapotec,
Rincón)**

copyright © 2009 Wycliffe Bible Translators, Inc.

Language: Zapotec, Rincón

Translation by: Wycliffe Bible Translators, Inc.

Zapotec, Rincón

zar

Mexico

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Rincón

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files dated 29 Jan 2022

58bf86df-ae22-508c-81dc-936dbf138c25